

**Po'lat o'tda toblanadi, odam mehnatda**

Metallurg Minbari



O'zbekiston metallurgiya kombinati aksiyadorlik jamiyatining ko'p nusxali gazetasi

2024-yil 28-oktabr № 10 (1544)
Gazeta 1992-yil 7-martdan nashr etilmoqda**"O'ZBEKISTON METALLURGIYA KOMBINATI" AKSIYADORLIK JAMIYATI**

YANGI BOSHQARUV RAISI – BOSH DIREKTOR TAYINLANDI

2024-yil 12-oktabr kuni "O'zmetkombinat" AJ Kuzatuv kengashi raisi, O'zbekiston Respublikasi Bosh vaziri Abdulla Aripov raisligida korxonada rahbarlari va bosh mutaxassislari ishtirokida kengaytirilgan yig'ilish bo'lib o'tdi.

shakllangan. Ular har qanday vazifalarini sharafla bajarishlariga ishonchim komil.

Jonajon kombinatimizda ishlash men uchun faqat quvonch keltirdi. Shu bois, men o'zimni baxtli inson, deb bilaman. Chunki mehnat faoliyatimni shu korxonada, malakali mutaxassislar, o'z sohasining ustalari orasida o'tkazdim. Kombinativimizga, metallurglar jamoasi-



bo'lgan Dilshod Ahmedov "O'zmetkombinat" AJ Boshqaruv raiisi – bosh direktori etib tayinlanganligi e'lon qilindi.

D. Axmedov I. Gubkin nomidagi Rossiya davlat neft va gaz universiteti va Moskva "Skolkovo" boshqaruv maktabini tamomlagan. 2021-yil yanvar oyidan boshlab D. Axmedov "O'zmetkombinat" AJ boshqaruv raisining birinchi o'rinbosari – ijrochi direktor lavozimida kombinat taraqqiyotiga katta hissa qo'shib keldi. 2024-yil yanvar oyidan buyon O'zbekiston Respublikasi Investitsiyalar, sanoat va savdo vazirining o'rinbosari, jumladan, "O'zmetkombinat" AJ Kuzatuv kengashi raisining o'rinbosari sifatida kombinatning faol taraqqiyot jarayonlarini nazorat qilib kelgan.

Yaqin orada Ahmedovning tayinlanishi "O'zmetkombinat" AJ Kuzatuv kengashi va aksiyadorlari tomonidan ham tasdiqlanishi kutilmoqda.

tantanalari ravishda zarhal chopon, do'ppi kiydirilib, gullar taqdim etildi.

Bosh vazir o'z nutqida Rashid Pirmatov rahbarligida "O'zmetkombinat" AJda keng ko'lamlil islohotlar muvaffaqiyatli amalga oshirilib, qator yutuqlarga erishilganligini ta'kidlab o'tdi.

R. Pirmatov barchaga hurmat va e'tibor uchun minnatdorchilik bildirib shunday dedi:

– Vaqt shiddat bilan o'tib, jonajon jamoa bilan xayrlashish vaqti keldi. Albatta, bu har bir

inson hayotida biroz qayg'uli bosqich. Lekin men "O'zmetkombinat" AJ, metallurglar jamoasidan, uning kelajagidan xotirjamman. Chunki korxonamizda har bir topshirilgan vazifaga katta mas'uliyat bilan yondoshib, sidqidildan samarali mehnat qiladigan jamoa



Yig'ilishda 2021-yildan buyon kombinatga rahbarlik qilib kelayotgan "O'zmetkombinat" AJ Boshqaruv raiisi – bosh direktor Rashid Pirmatov tantanalil ravishda pensiyaga kuzatildi.

Kombinatdagi ko'p yillik samarali mehnati uchun minnatdorchilik belgisi sifatida unga

**BUGUNGI
SONDA****KASABA
UYUSHMALARI****"El aziz, inson aziz"****TIBBIYOT****Dardga darmon
shifokorlar**

3

OGOHLIKKA DA'VAT**Ehtiyot bo'ling,
is gazi!**

4

FAXRIMIZ**O'z davrining
mashhur po'lat
erituvchisi**

5

**ACHCHIQ, AMMO
OCHIQ GAPLAR****So'nggi pushaymon
o'zingga dushman**

8

SO'RAGAN EDINGIZ**Ish haqi
saqlanadimi?**

9

SALOMATLIK**Sovuqda qaysi
kasalliklar avj oladi?**

10

TAFAKKUR QIL**Qaytar dunyo, bu...**

12

11-NOYABR – O‘ZBEKISTON KASABA UYUSHMALARI KUNI

"EL AZIZ, INSON AZIZ"

Bugungi kunda mamlakatimizda erkin va farovon hayot, demokratik jamiyat qurish yo‘lida olib borilayotgan izchil islohotlarda va ularning amaliy natijalarini ta‘minlashda kasaba uyushmalarining ham munosib hissasi bor. O‘zbekiston kasaba uyushmalari faoliyati davomida yuksalish va pasayish davrlari ham yuz bergan, lekin bu tashkilot hech qachon o‘z dolzarbligini yo‘qotmagan.

Mamlakatimiz kasaba uyushmalari eng yirik jamoat tashkiloti hisoblanadi. Uning a‘zolari soni doimiy tarzda ko‘payib bormoqda.

Shuning uchun ham har yili 11-noyabr – O‘zbekiston kasaba uyushmalari kuni yurtimizning barcha ishchi-xodimlari tomonidan muhim sana sifatida keng nishonlanib kelinmoqda.

O‘zbekiston kasaba uyushmalari kunining belgilanishi, eng avvalo, kasaba uyushmalari tashkilotlarini ma‘naviy qo‘llab-quvvatlash, ularning yanada samarali faoliyat yuritishini ta‘minlash, tashkilot fidoyi xodimlarini rag‘batlantirishga xizmat qiladi. Bu bilan mehnatkashlar huquqlari himoya qilinishi ustidan jamoatchilik nazorati ta‘sirchanligini oshirish kutilmoqda.

O‘z oldiga qo‘ygan ulkan va ezgu vazifalarni amalga oshirish, "El aziz, inson aziz" degan olijanob g‘oyani yurtimizdagi har bir korxonada va tashkilotda qaror top tirish, mehnatni farovonlik va baxt manbaiga aylantirish ko‘p jihatdan kasaba uyushmalarining samarali faoliyatiga ham bog‘liqdir.

"O‘zmetkombinat" AJ kasaba uyushmasi qo‘mitasi o‘z a‘zolari bo‘lgan ishchi-xodimlarning huquqlarini kombinat boshqaruvi bilan tuzilgan Jamoa shartnomasiga ko‘ra O‘zbekiston Respublikasi

Konstitutsiyasi, Mehnat kodeksi va boshqa me‘yoriy-huquqiy hujjatlarga muvofiq himoya qilib kelmoqda.

Shuningdek, kombinat ishchi-xodimlari va ish beruvchi o‘rtasidagi mehnat, ijtimoiy-iqtisodiy, kasbiy va tashkiliy munosabatlarni tartibga soluvchi lokal me‘yoriy-hujjatlar asosida ham faoliyat yuritmoqda.

Kombinat Birlashgan kasaba uyushmasi qo‘mitasining ixtiyoriga sog‘lomlashtirish, dam olishni tashkil qilish va madaniy hamda sport tadbirlarini

o‘tkazish uchun ijtimoiy soha obektlari topshirilgan. Jumladan, "Metallurg" pansionati, Metallurglar madaniyat saroyi va "Metallurg" mehmonxonasi, metallurglar sport-sog‘lomlashtirish majmuasiga qo‘mita boshchilik qiladi. Shuningdek, kombinat kasaba uyushmasi qo‘mitasi yoz mavsumida Sirdaryo bo‘yida joylashgan "Sohil" bolalar sog‘lomlashtirish oromgohida metallurglar farzandlarining maroqli dam olishlarini ham tashkil etib kelmoqda. Shuningdek, qo‘mita tomonidan ishchi-xodimlarning dam olish kunlari ko‘ngilochar tadbirlarga borib kelishlari ham ta‘minlanadi.

Metallurglarning huquq va erkinliklarini, ularning qonuniy manfaatlarini ta‘minlash, mehnat jamoalari a‘zolarini ijtimoiy-iqtisodiy qo‘llab-quvvatlash ishlarida faol qatnashayotgan kasaba uyushma qo‘mitasi xodimlarini, a‘zolarini kelayogan kasaba uyushmalari kuni bilan tabriklaymiz.

Barchalariga mustahkam sog‘lik, oilalariga fayz-u baraka, mas‘uliyatli faoliyatlarida ulkan muvaffaqiyatlar tilaymiz.

Inomjon
HAYITOV.



INSON UCHUN E‘TIBOR VA G‘AMXO‘RLIK JUDA MUHIM

Kasaba uyushma qo‘mitasi kombinat ishchi-xodimlari faoliyatining ajralmas qismiga aylangan. Zero, bizning huquqlarimizni himoya qiladigan, kombinat ishchi-xodimlarining xavfsiz mehnat sharoitlarda ishlashini, munosib maosh olishini ta‘minlovchi, dam olish va salomatliklarini mustahkamlashga sharoitlar qilib beradigan aynan shu tashkilotdir.

Kombinat ishchi-xodimlari kasaba uyushmasi qo‘mitasining imtiyozli yo‘llanmalari hisobidan O‘zbekistondagi sanatoriylarda dam olishlari va sog‘lig‘ini mustahkamlashlari mumkin. "Metallurg" pansionatida hordiq chiqarganlar kasaba uyushmasi borligidan, uning g‘amxo‘rliklaridan mamnun bo‘lishadi.

Ko‘pchilik kasabaqo‘m tashkil etgan Toshkent shahar drama teatri spektakllarida, taniqli san‘atkorlarning konsertlarida bo‘lishgan. Ular bu tomoshalardan katta zavq olib keladilar. Bu tadbirlar ularning kuchiga kuch, g‘ayratiga g‘ayrat qo‘shishiga shubha yo‘q.

Kasabaqo‘m tomonidan Navro‘zda Respub-

likamizning turli hududlarining milliy urf-odatlari, an‘analari namoyish etilgan ajoyib bayram uyushtirilganligini hamon zavqlanib yodga olamiz.

Har bayramda kombinat boshqaruvi kasaba uyushma qo‘mitasi bilan hamkorlikda faxriylar, nogironlar va kam ta‘minlangan oilalar uchun beg‘araz yordam ko‘rsatadi. Ularga g‘amxo‘rlik qiladi. Qorbobo, Qorqiz va ertak qahramonlari ishtirokida katta archa atrofida o‘tkaziladigan tomoshalar, ayniqsa, bolajonlarga zavq-shavq ulashadi. "Mehribonlik" uyidagilar va maktab-internat o‘quvchilari Qorbobo va Qorqizni xursandchilik bilan kutib olishadi. Oddiy odamlar uchun ko‘rsatilayotgan bunday e‘tibor va g‘amxo‘rlik juda muhimdir.

Men tarkibiy bo‘linmalarda kasaba uyushmalarida jamoatchilik asosida ishlaganman. Shunga ko‘p bor amin bo‘ldimki, ishda janjal, og‘ir moddiy qiyinchiliklar, oilada baxtsizlik bo‘lsa ishchi-xodimlar kombinatda asosan kasaba uyushmasi qo‘mitasiga murojaat qiladilar. Nega? Chunki

bu tashkilotdan amaliy yordam olish mumkin. Mening o‘zim ham shunday vaziyatlarda kasaba uyushma qo‘mitasidan yordam so‘raganman va ko‘mak olganman. Ehhe qanchadan qancha muammolar kasaba uyushma qo‘mitasi ishtirokida hal etiladi. Ularga rahmat.

Metallurglarning huquq va manfaatlarini himoya qilishdek asosiy vazifani hal etishda kasaba uyushma qo‘mitasi barcha qonuniy usullardan foydalanib keladi. Keling, bir eslaylik – 2017-yilda yubiley uchun xodimlarga beriladigan nafaqalar bekor qilingan edi. Tabiiyki, metallurglar norozi bo‘lishdi. Kasaba uyushmasi qo‘mitasining aralashuvi bilan yana bu masala Jamoa shartnomasiga qaytadan kiritildi. Natijada endilikda ishchilar ko‘p yillik mehnatlari uchun yubiley bilan munosabati bilan yana mukofot olishmoqda.

Yana bir misol, birinchi farzand tug‘ilishi munosabati bilan kombinat xodimiga beriladigan mablag‘ to‘lab berilishi bekor qilingan edi. Ammo kasaba uyushmasi qo‘mitasining sa‘y-harakatlari bilan yosh metallurglar yana avvalgidek bir martalik rag‘batlantirish imtiyozidan foydalanadigan bo‘ldilar.

Kasaba uyushma qo‘mitasining a‘zolarining mehnatga oid huquq va manfaatlarini ta‘minlash, mehnat jamoalarida xodimlarni ijtimoiy-iqtisodiy qo‘llab-quvvatlash maqsadida olib borayotgan ishlari-ga muvaffaqiyatlar yor bo‘lsin. Mana shunday faoliyat ko‘rsatayotgan kasaba uyushmalaridan minnatdormiz.

Elmira ACHKELYAMOVA.



18-NOYABR – O‘ZBEKISTON DAVLAT BAYROG‘I QABUL QILINGAN KUN

Mamlakatimizda 27-oktabr kuni O‘zbekiston Respublikasi Oliy Majlisi Qonunchilik palatasi va xalq deputatlari viloyat, tuman, shahar Kengashlariga bo‘lib o‘tgan saylovlar O‘zbekistonda barcha sohalarda, jumladan, siyosiy-huquqiy, ijtimoiy, iqtisodiy, ma‘naviy-ma‘rifiy yo‘nalishlarda amalga oshirilayotgan keng ko‘lamli, jadal islohotlarning uzviy qismidir.

DEMOKRATIK TAMOYILLAR ASOSIDA BO‘LIB O‘TDI

Saylov xalqaro me‘yorlar va standartlarga hamda milliy saylov qonunchiligimiz, unda belgilangan ochiqlik, oshkorlik va adolat kabi demokratik prinsiplarga to‘la mos holda, ko‘tarinki ruhda o‘tdi.

Bu yil yangilangan Konstitutsiya va milliy saylov qonunchiligiga binoan mamlakatimiz tarixida ilk bor parlament saylovi aralash – majoritar va proporsional saylov tizimi asosida tashkil etildi. Ertalabdan yurtimizning barcha hududida parlament va mahalliy Kengash deputatlari saylovi faollik bilan boshlanib, 11 ming 28 ta saylov uchastkalarida fuqarolar o‘z fuqarolik burchini amalga oshirdilar. Shuningdek, O‘zbekiston Respublikasining 40 ta xorijiy davlatdagi diplomatik va konsullik muassasalari huzuridagi 57 ta saylov uchastkasida xorijdagi vatandoshlarimiz saylash huquqidan foydalandi.

Joriy yilgi saylovda Saylov jarayonini boshqarishning avtomatlashgan tizimidagi saylovchilarning elektron ro‘yxatiga mamlakatimizdagi 19 million 944 ming 859 nafar saylovchi kiritilgan. Bundan tashqari, chet elardagi saylovchilarimiz 165 ming 631 nafarni tashkil etdi.

Yurtimizda yangi tizim asosida bo‘lib o‘tgan saylovni kuzatishda 850 dan ortiq xorijiy va xalqaro kuzatuvchi ishtirok etdi. Shuningdek, siyosiy partiyalardan 55 ming nafar, fuqarolarning o‘zini o‘zi boshqarish organlaridan 10 ming nafardan ziyod kuzatuvchi saylovni bevosita kuzatib bordi.



XALQNI BIRLASHTIRUVCHI KUCH

1991-yil 18-noyabr xalqimiz yodida o‘chmas va qutlug‘ sana bo‘lib qoldi. Shu kuni “O‘zbekiston Respublikasining Davlat bayrog‘i to‘g‘risida”gi qonun qabul qilindi. Davlatimiz bayrog‘i boshqa ramzlar bilan birga xalqimizning shon-sharafi, tarixiy xotirasi va intilishlarini o‘zida mujassam etib, shu yurtda yashovchi har bir fuqaroga g‘urur, faxr va iftixor bag‘ishlaydi. Bayrog‘imizga nazar solganimizda yoki madhiyamiz yangraganda biz ruhan jo‘shqinlikni, azmu shijoatimiz oshganini, qalbimizda g‘urur va buyuk istiqbolga ishonch tuyg‘usini his etamiz.

O‘zbekiston Respublikasining Davlat bayrog‘ining butun uzunligi bo‘ylab o‘tgan to‘q moviy rang, oq rang va to‘q yashil rangli uchta endan tarkib topgan to‘g‘ri to‘rt burchak shaklidagi matodir. O‘zbekiston Respublikasi Davlat bayrog‘ining uzunligi 250 santimetr, kengligi 125 santimetr teng. Moviy rang, oq rang va yashil rangli enlarning kengligi bir xil. Har bir en 40 santimetr tengdir. O‘zbekiston Respublikasi bayrog‘ining oq rangli enning chetlaridan kengligi 2,5 santimetr teng qizil hoshiyalar o‘tkazilgan.

Davlat bayrog‘i va uning ramzi bugungi O‘zbekiston sarhadida qadimda mavjud bo‘lgan davlatlar bilan tarixan bog‘liqligini anglatadi hamda Respublikaning milliy-madaniy an‘analarini o‘zida mujassamlashtiradi.

Bayroqdagi moviy rang tiriklik mazmuni aks etgan mangu osmon va obihayot ramzi. Timsollar tilida bu – yaxshilikni, donishmandlikni, halollikni, shon-shuhrat va sadoqatni bildiradi.

Bayroqdagi oq rang – muqaddas tinchlik ramzi bo‘lib, u kun charog‘onligi va koinot yoritqichlari bilan uyg‘unlashib ketadi. Oq rang – poklik, beg‘uborlik, soflilikni, orzu va xayollar tozaligi, ichki go‘zallikka intilishning timsoli.

Yashil rang – tabiatning yangilanish ramzi. U ko‘pgina xalqlarda navqironlik, umid va shodumonlik timsoli hisoblanadi.

Qizil chiziqlar – vujudimizda jo‘shib oqayotgan hayotiy qudrat irmoqlarini anglatadi.

Navqiron yarim oy tasviri tarixiy an‘analarimiz bilan bog‘liq. Ayni paytda u qo‘lga kiritilgan mustaqilligimiz ramzi ham. O‘zbekiston Respublikasi davlat bayrog‘ida-



gi 12 yulduz tasviri tarixiy an‘analarimiz, qadimgi yil nomamizga bevosita aloqador. Bizning o‘n ikki yulduzga bo‘lgan e‘tiborimiz O‘zbekiston sarhadidagi qadimgi davlatlar ilmiy tafakkurida nujum ilmi taraqqiy etganligi bilan ham izohlanadi.

Mamlakatimiz a‘zolari qatnashyotgan xalqaro miqyosdagi siyosiy, madaniy-ma‘rifiy tadbirlarda, olimpiada o‘yinlaridan tortib boshqa nufuzli sport musobaqalarida ham bayrog‘imiz Vatanimizning sha‘ni, xalqimizning g‘ururini yorqin aks ettirmoqda. Masalan, xalqaro sport bellashuvlarida g‘alaba qozongan sportchilarimiz sharafiga yurtimiz bayrog‘i baland ko‘tarilib madhiyamiz yangragan lahzalarda har birimiz cheksiz hayajonga tushamiz, hech kimdan kam emasligimizdan g‘ururlanamiz.

Davlatimiz bayrog‘i tinch va osoyishta, ozod hamda erkin hayotimiz, yorug‘ kelajagimizga bo‘lgan ishonchimiz timsolidir.

Davlat ramzlarining muqaddasligini, ular bizga yurt manfaati har narsadan ustunligini anglatib, eslatib turishini har birimiz, ayniqsa, yosh avlod yodda tutishi maqsadga muvofiqdir.

10-NOYABR – TIBBIYOT XODIMLARI KUNI

DARDGA DARMON SHIFOKORLAR

Yangi O‘zbekiston taraqqiyot strategiyasida bosh mezon etib belgilangan “Inson qadri uchun” degan tamoyil har bir fuqaro uchun munosib turmush sharoitini yaratishni nazarda tutadi. Shu jumladan, insonlarga munosib turmush sharoitini yaratishda sog‘liqni saqlash tizimi ham alohida ahamiyat kasb etadi. O‘tgan davr mobaynida yurtimizda sog‘liqni saqlash tizimini yangi rivojlanish bosqichiga olib chiqish borasida ulkan islohotlar hamda keng ko‘lamli ishlar amalga oshirildi.

Ayni shu maqsadda keyingi yillarda O‘zbekiston sog‘liqni saqlash tizimi tubdan isloh qilinmoqda. Sohaning moddiy-texnik bazasi, kadrlar salohiyati mustahkamlanmoqda. Tizimga ilg‘or davolash va diagnostika usullari, innovatsion texnologiyalar keng tatbiq etilmoqda.

Sohaga davlat tibbiy sug‘urtasi va raqamlashtirish mexanizmlari bilan birga xususiy tibbiyot muassasalari faoliyati ham keng joriy etilmoqda. Shifoxonalarni zamonaviy transport va tibbiy jihozlar bilan ta‘minlash darajasi keskin yaxshilanmoqda.

Aynan ana shunday o‘zgarishlar, jonkuyar shifokorlar, yuqori malakali tibbiyot mutaxassislari, hamshiralarning mashaqqatli mehnati tufayli yuqori texnologik jarrohlik operatsiyalari nafaqat poytaxtimiz va viloyatlar markazlarida, balki tumanlarda, Bekobod shahrida ham muvaffaqiyatli o‘tkazilmoqda va minglab bemorlar o‘z dardiga shifo topmoqda.


Albatta, inson manfaatlarini ta‘minlash, fuqarolarimiz salomatligini mustahkamlash, ularning hayotdan, bugungi davr islohotlaridan rozi bo‘lib yashashi yo‘lida sohada amalga oshirilayotgan izchil islohotlar o‘zining samarasini beradi.



“O‘zmetkombinat” aksiyadorlik jamiyati ishchi-xodimlari sog‘liklarini tiklash va mustahkamlashda “Metallurg” shahar shifoxonasi, poliklinikasi, shahrimizdagi sanatoriy-profilaktoriy, bo‘linmalarda faoliyat ko‘rsatayotgan tibbiyot punktlarida keng hajmdagi ishlar olib boriladi. Bu shifo maskanlari kerakli tibbiyot texnikalari bilan jihozlangan bo‘lib, ular yanada takomillashtirilib borilayapti.

Ular tomonidan profilaktika tadbirlari va metallurglar salomatligini mustahkamlash yo‘lida faol ish olib borilmoqda.

Ularining bu boradagi sa‘y-harakatlari jamiyatimizda sog‘lom turmush tarzini shakllantirish, tibbiy xizmat sifatini yanada oshirish, inson



manfaatlarini mustahkamlash va el salomatligini muhofazalashga xizmat qilayotir.

Aziz shifokorlar! Sizlarni kelayotgan kasb bayramlaringiz bilan tabriklaymiz.

Kelgusi faoliyatingizda ulkan muvaffaqiyatlar, oilaviy baxt-saodat, xonadonlaringizga qut-baraka tilaymiz.

Hasanboy SHOKIROV.

MANFAATLAR TO'QNASHUVI:

TARAQQIYOT TO'SIG'I

Jamiyatga katta zarar keltiradigan illatlardan biri – manfaatlar to'qnashuvi. U bor joyda sohalar rivojlanish o'rniga, orqaga ketadi, adolatsizlik bo'ladi, o'zaro ishonch so'nadi, mutaxassislar salohiyati ro'yobga chiqmaydi.

Manfaatlar to'qnashuvi bu shaxsning bevosita yoki bilvosita shaxsiy manfaati mansab, xizmat majburiyatlarini ob'ektiv va xolis bajarishiga ta'sir ko'rsatuvchi yoki shunday ta'sir ko'rsatishi mumkin bo'lgan vaziyat hamdir. O'z vaqtida bunga qarshi keskin kurashilsa, ya'ni manfaatlar to'qnashuviga chek qo'yilsa, korrupsiya barham topadi, ish faoliyatida o'zgarish, rivojlanish bo'ladi.

Joriy yil 5-iyun kuni Prezidentimiz tomonidan "Manfaatlar to'qnashuvi to'g'risida"gi qonun imzolandi. Bu qonun bilan manfaatlar to'qnashuvini o'z vaqtida aniqlash, oldini olish va tartibga solishning aniq tartibi belgilandi. Uning davlat va jamiyat rivoji uchun ahamiyati yuqori.

Qonunning asosiy g'oyasi jamiyat va davlat manfaatlarini shaxsiy manfaatlardan ustun ekani bilan xarakterli. Asosiy maqsad mansabdor shaxslarning noqonuniy daromad olishining oldini olish va manfaatlar to'qnashuvini bartaraf etishdan iboratdir.

O'z mohiyatiga ko'ra, "Manfaatlar to'qnashuvi to'g'risida" qonun korrupsiyaga qarshi kurash siyosatining asosi bo'lib, davlat xizmatining halol, shaffof, hisobdor va samarali ta'minlanishining asosiy vositalaridan biri hisoblanadi.

Manfaatlar to'qnashuvi tushunchasiga aniq ta'rif berilgan bo'lib, unga ko'ra, manfaatlar to'qnashuvi davlat tashkiloti xodimining, uning yaqin qarindoshlarining va unga aloqador shaxslarning shaxsiy manfaatlarini bilan fuqarolarning, tashkilotning yoki davlatning huquqlari va qonuniy manfaatlarini o'rtasida qarama-qarshilik yuzaga kelgan va kelayotgan yoxud yuzaga keli-

shi mumkin bo'lgan vaziyatdir.

Qonun davlat organi xizmatchisi o'z xizmat majburiyatlarini vijdonan bajarish, manfaatlar to'qnashuviga olib keladigan yoki olib kelishi mumkin bo'lgan shaxsiy manfaatdorlikka yo'l qo'ymaslik, o'zida yoki boshqa xodimlarda sodir bo'lishi mumkin bo'lgan manfaatlar to'qnashuvi holatlarining oldini olishda majburiyatlar yuklaydi.

Davlat organining yoki boshqa tashkilotning mansabdor shaxsi yoki xodimi tomonidan manfaatlar to'qnashuvi to'qnashuvi mavjudligi haqida xabar bermaslik uchun qonunda ma'muriy javobgarlik nazarda tutilgan. Shuningdek, mavjud yoki ehtimoliy manfaatlar to'qnashuvini tartibga solish yuzasidan choralar ko'rmaslik ham javobgarlikka sabab bo'ladi.

Qonunning yana bir tomoni, endilikda manfaatlar to'qnashuviga yo'l qo'yilganligi sababli davlat tashkilotiga moliyaviy-iqtisodiy zarar yetsa, ushbu zararni manfaatlar to'qnashuviga yo'l qo'ygan insonning o'zi qoplaydi.

Mazkur qonunning qabul qilinishi davlat idoralarda korrupsiyaviy omillarning kamayishiga, davlat tashkilotlarida manfaatlar to'qnashuvining oldini olishga xizmat qiladi. Bunday holatlarni aniqlash va tartibga solishning samarali mexanizmlarini joriy etish, uning huquqiy oqibatlarini aniq belgilash, davlat xizmatida tanish - bilishchilik, qarindosh - urug'chilikning oldini olishga zamin yaratadi.

Biz – "O'zmetkombinat" AJ jamoasi ham manfaatlar to'qnashuvi va korrupsiyaga qarshi hamkorlikda murosasiz kurashishimiz shart. Bu har



birimizning burchimizdir.

Bir sohada ishlayotgan hamkasblarimizning o'z foydasini o'ylab, kombinatimizga zarar keltirishiga befarq bo'lmaylik. Befarqlik, nafaqat kombinatimizga balki, kasbdoshimizning kelajagiga, uning oilasiga, farzandlariga ham o'z ta'sirini o'tkazmasdan qolmaydi.

Kombinatning har bir rahbar va xodimi o'z lavozim majburiyatlarini, xizmat vakolatlarini sidqidildan halol bajarishi, shaxsiy manfaatlarini bilan bog'liq har qanday harakatlarga aralashmasligi kerak. Aksincha bunday holatlar haqida xabar topganlar "Manfaatlar to'qnashuvi to'g'risi"dagi qonunda belgilanganidek o'ziga ma'lum bo'lgan manfaatlar to'qnashuvi hollari to'g'risida xabar berishi zarur.

Biz xalqimiz, oilamiz bilan kuchli taraqqiy etgan davlatda, farovon hayotda yashashni xohlar ekanimiz, korrupsiyaning asosi bo'lgan manfaatlar to'qnashuviga birgalikda qarshi kurashishimiz dardkor.

To'liqin XOJIYEV,

"O'zmetkombinat" AJ Korporativ xavfsizlik va resurslarni himoya qilish departamenti direktori.

EHTIYOT BO'LING, IS GAZI!

GAZ JIHOZLARIDAN FOYDALANISHGA RIOYA QILING!

Hurmatli metallurglar!

Qish fasli yaqinlashishi bilan aholining gazga bo'lgan ehtiyoji keskin oshadi. Gaz jihozlaridan foydalanganda xavfsizlik qoidalariga qat'iy rioya etishlaringizni so'raymiz.

Xonadoningizni gaz bilan isitganingizda inson hayoti uchun zarur bo'lgan kislorod yoqilib xavfli is gazi ajrab chiqishiga sabab bo'ladi. Bu gaz inson organizmini zaharlaydi. Xona havosi tarkibida 1 foiz is gazi bo'lganda zaharlanish uchun bir necha marta nafas olishning o'zi kifoya bo'ladi. Bunday havodan 2-3 daqiqa davomida nafas olgan inson gazdan zaharlanib hushini yo'qotishi mumkin.

O'zingiz, oila a'zolaringiz va yaqinlaringizning mulkini, sog'lig'i va hayotini asrash uchun quyidagi qoidalarga rioya qiling!

ESDA TUTING! QUYIDAGILAR TAQIQLANADI:

- gaz jihozlarini qarovsiz qoldirish;
- gaz jihozlari turgan xonada uxlash va dam olish;
- o'zboshimchalik bilan uyni gazlashtirish, gaz jihozlarining o'rnini almashtirish va qo'shimcha o'rnatish;
- gaz jihozlari o'rnatilgan xonalar rejasini o'zgartirish;
- dudburon va shamollatish tizimlarini o'zgartirish. Shamollatish kanallarini to'sib qo'yish;
- gazdan va gaz asboblaridan boshqa maqsadlarda foydalanish, gaz plitalaridan xonalarni isitish uchun foydalanish;
- gaz sizib chiqishini aniqlash uchun olov yoqib tekshirish;
- rezina shlang orqali gaz jihozlarini ulash va ulardan foydalanish;

– nostandart va nosoz gaz jihozlari o'rnatish va foydalanish.

Tutun tortish dudburonlari sozligini tekshirmasdan isitish moslamalarini yoqish taqiqlandi. Bu kishilar zaharlanishi va yong'in chiqishiga olib kelishi mumkin.

ISITISH ASBOBLARINI YOQISHDAN AVVAL QUYIDAGILARNI TEKSHIRISH ZARUR:

- gaz tarmoqlarini va o'chirish moslamalarining zichligini;
- xavfsizlik avtomatikasi va dudburonlarning sozligini;
- dudburonda tortuvchi kuch borligini;
- isitish moslamalari va gorelkalarning sozligini;
- ko'p qavatli uylarning ayvonlariga gaz plitalarini chiqarib olish.

Shunday o'zboshimcha harakatlar yong'inga, portlashga, xavfli hollarga olib kelishi mumkin.

GAZ HIDINI SEZGANDA ZUDLIK BILAN QUYIDAGILARNI AMALGA OSHIRISH ZARUR:

- gaz plitalari va isitish pechlarini gaz tarmog'idan o'chiring;
- darrov eshik va derazalarni ochib, xonani shamollating;
- xonada elektr jihozlarini yoqmang, yoniq bo'lsa o'chirmang, chunki bu yong'in yoki gaz-havo aralashmasining chaqnashiga sabab bo'lishi mumkin;
- gaz chiqayotgan joyni aniqlash uchun ochiq olovdan emas, sovun ko'pigidan foydalaning!

Javlon UMIRZOQOV,

"O'zmetkombinat" AJ OYOXTTEB inspektori, serjant.



MASHHUR OLIM VA DAVLAT ARBOBI

Bu yil mamlakatimizda o'zbek xalqining buyuk qomusiy olimi, Temuriylar davlatining mashhur hukmdori Muhammad Tarag'ay Mirzo Ulug'bek tavalludining 630 yilligi keng nishonlanmoqda. Bu haqda Prezident qarori qabul qilingan. Buyuk ajdodimiz o'zining boy ilmiy-ma'rifiy merosi hamda mislsiz bunyodkorlik faoliyati bilan yurtimiz taraqqiyoti va jahon sivilizatsiyasi rivojiga beqiyos hissa qo'shgan ulkan tarixiy siymodir.

Mirzo Ulug'bek 1394-yil 22-mart kuni Amir Temurning to'rtinchi o'g'li Shohrux Mirzo oilasida dunyoga kelgan. 1411-yilda 17 yoshli Ulug'bek Movarounnahr va Turkistonning hokimi etib tayinlanadi. U yoshligida fan va san'at turlariga, ayniqsa, matematika va astronomiyaga katta qiziqish bildiradi.

O'rta asrlarda ona zaminimizda yuzaga kelgan ikkinchi Uyg'onish davrining yorqin namoyandasi hisoblangan Mirzo Ulug'bek uzoq yillar o'z saltanatini adolat va insonparvarlik g'oyalari asosida boshqarish va keng ko'lamlil buniyodkorlik ishlarini amalga oshirish bilan birga ilm-fan, madaniyat va san'at sohaslarini yuksaltirishga alohida e'tibor qaratdi. Ulug'bek davrida Samarqand ilm-fan o'choqlaridan biriga aylangan. U yerda 15-asrning birinchi yarmida Ulug'bekning atrofida o'z davrining eng ilg'or fikrli va ilmi kishilari to'planadi.

Uning tashabbusi va homiyligi ostida ko'plab madrasalar, maktablar, kutubxonalar, masjidlar, karvonsaroylar, ko'priklar hamda so'lim bog'lar barpo etildi. Natijada o'lkamiz har tomonlama taraqqiy etib, sharqdagi yirik madaniyat va ilm-fan diyoriga aylandi.

Mirzo Ulug'bek matematika, fizika, tarix,



me'morchilik sohaslarida ulkan natijalarni qo'lga kiritdi. Buyuk alloma, ayniqsa, Samarqand shahridagi o'zi bunyod ettirgan rasadxonada amalga oshirgan keng qamrovli ilmiy tadqiqotlari, kashfiyotlari bilan jahon astronomiya fanining rivojida tub burilish yasadi. Ulug'vatandoshimizning ana shunday izlanishlari natijasida yuzaga kelgan "Ziji jadidi Ko'ragoniy" asari hozirgi paytda ham yulduzlar ilmi sohasida dunyodagi eng buyuk asarlardan biri sifatida e'tirof etilib, olimlar tomonidan katta qiziqish bilan o'rganilmoqda.

Bu asardan tashqari uning qalamiga mansub matematik asari "Bir daraja sinusini aniqlash haqida risola", astronomiyaga oid "Risolayi Ulug'bek" (yagona nusxasi Hindistonda, Aligarh universiteti kutubxonasida saqlanadi) va tarix-

ga doir "Tarixi arba' ulus" ("To'rt ulus tarixi") asaridir.

Ma'lumotlarga ko'ra, Ulug'bek tibbiyot va musiqaga ham qiziqqan. Jumladan, Alisher Navoiy "Majolis un-nafois" asarida uning she'rlaridan namunalar keltirib o'tgan.

Ulug'bek rasadxonasi – Samarqand shahri-ning eng diqqatga sazovor obidalaridan biri 1428-1429-yillarda Cho'ponota tepaligida ulkan silindr shaklida bunyod etilgan. Unda kattagina globusda iqlimlarning chegaralari, tog'lar, cho'llar, dengizlar va daryolar ko'rsatilgan. Zahiriddin Muhammad Boburning "Boburnoma" asarida yozilishicha, balandligi 30, 4 metr-dan iborat 3 qavatli bino qurilgan. Rasadxonada o'ndan ortiq turli astronomik qurilmalar va asboblardan iborat. Uning ichiga o'rnatilgan juda katta asbob yordamida Quyosh, Oy, sayyora va yulduzlar katta aniqlikda o'rganilgan. Shuningdek, ma'lumotlarga ko'ra rasadxonada kutubxon bo'lgan.

Mustaqillik yillarida Mirzo Ulug'bekning hayoti va faoliyatini har tomonlama o'rganish va ommalashtirish maqsadida ko'plab tadqiqotlar, mahalliy va xalqaro miqyosda ilmiy-amaliy anjumanlar muntazam o'tkazib kelinmoqda. Uning davrida bunyod etilgan me'moriy obidalarni asrab-avaylashga alohida ahamiyat qaratilmoqda.

Mirzo Ulug'bek ilmiy-ma'rifiy merosi mamlakatimiz va xalqaro miqyosda o'rganilmoqda. Buyuk ajdodimiz asarlari yosh avlod intellektual va ma'naviy salohiyatini oshirish va shu asosda Yangi O'zbekistonning munosib bunyodkorlari etib tarbiyalashga xizmat qilmoqda.

Hasanboy SHOKIROV.

O'Z DAVRINING TANIQLI PO'LAT ERITUVCHISI

Mamajon Yodgorovning bir yoshligida – 1942-yilda otasi urushga ketib dom-daraksiz ketgan. U yolg'iz farzand sifatida onasining yaqin dastiyori bo'lgan. Shuning uchun ham yoshlikdan mehnatdan qochmaydigan, har qanday ishni do'ndirib tashlaydigan inson bo'lib voyaga yetgan. O'quvchilik davrida metallurgiya sohasiga qiziqib qolgan. Shuning uchun ham 1959-yil o'rta maktabni tugatganidan so'ng Bekobod kasb-hunar bilim yurtiga o'qishga kiradi. Oradan ikki yil o'tib o'qishni bitirganidan so'ng O'zbekiston metallurgiya zavodining Prokat sexiga – tunika ishlab chiqarish uchastkasiga ishga qabul qilinadi. Dastlab valslovchi yordamchisi bo'lib ish boshlaydi.

– O'sha paytlarda Ismoil aka

Madaminov Prokat sexida usta bo'lgan, meni o'zining brigadasiga ishga chaqirib olgan edi. Bu kishi mening ustozim bo'lgan, – deb eslaydi Mamajon ota.

Ustozi uni Bekobod shahridagi og'ir sanoat texnikumining kechki bo'limiga o'qishga kirishga tavsiya etadi. Texnikumga o'qishga kirganidan so'ng ish vaqti boshlanguncha yoki ishdan keyin darsga qatnab, ham o'qib, ham ishlaydi. 1966-yil po'lat erituvchi mutaxassisligi bo'yicha diplom oladi.

Ustozi "O'qishni bitirgan bo'lsang, po'lat erituvchilikka o'tasan" deb o'sha yillari Marten sexi boshlig'i bo'lgan Rixsivoy Yusupovning oldiga olib boradi. Shundan so'ng M. Yodgorov po'lat erituvchi yordamchisi bo'lib ish boshlagan. 1969-yildan boshlab esa mustaqil po'lat erituvchi bo'lib ko'p yillar mehnat qildi.

Chehrasidan nur, aql-zakovat taralib turgan, og'ir-vazmin, mulohazali bu otaxon o'zi haqida shunday deydi: "30 yil bekobodlik metallurklar jamoasida ishladim. Og'ir ishda o'ta yuqori haroratda ishlaganim uchun 1991-yil 50 yoshimda

pensiyaga chiqdim. Pensiyadan keyin yana 4 yil – 1995-yilgacha zavodda ishladim. Shundan so'ng dehqonchilik bilan shug'ullandim".

Otaxon mehnatda erishgan yutuqlari uchun ikki marta – 1961 va 1982-yillar ordenlar bilan mukofotlangan. O'sha davrning nufuzli markaziy organlari a'zosi, eng e'tiborli anjumanlar delegati bo'lgan.

– 1972-yilda Rossiyaning Cherepevskiy zavodida metall eritish tanlovida qatnashganimda "Men O'zbekistondan keldim, O'zbekistonda metall zavodi bor", – desam, ular hayron bo'lishib, "O'zbekiston qaerda", – deb so'rashgan. Allohga shukr mustaqilligimiz sharofati bilan yurtimizni butun dunyo tanidi, tan oldi, – deydi 84 yoshli otaxon.

M. Yodgorov 1978-yilda Ukrainaning Zaporozhe zavodida metall eritish tanlovlarida ham qatnashgan. Bu tanlovlarda u zavodimiz sharafini munosib himoya qilgan.

– Men 1982-yil zavod tomonidan o'sha davrdagi mamlakatning eng zo'r yengil mashinasi bo'lgan "Volga" bilan mukofotlandim. Allohga shukur, halol mehnatim bilan hamma narsaga erishdim. Mening shu darajaga yetib kelishimda to'g'ri yo'l ko'rsatgan ustozim Ismoil aka Madaminovni ham hanuz hurmat



bilan eslayman. Shuningdek, yana Ravshan aka Ochilov, Bo'ron aka kabi sofdil, mehribon insonlarning maslahatlarini to'g'ri qabul qilib, mehnatda yaxshi natijalarga erishganman. Bu insonlar juda mehr-oqibatli bo'lganliklarini, doimo yordam berganliklarini o'ylab, ular haqiga duolar qilaman. Bizning xalqimizdek mehr-oqibatli, insof-diyonatli millat bo'lmasa kerak.

Endilikda Mamajon Yodgorov piru-badavlat otaxonlardan biri. Farzandlari, nabiralari, shogirdlari ardog'ida keksalik gashtini surib umrguzaronlik qilmoqda.

Xayriniso RASULOVA.



“KONSTITUTSIYA – ERKIN VA FAROVON HAYOT GAROVI!”



“O‘zbekiston Respublikasi Konstitutsiyasi kuni bayramiga tayyorgarlik ko‘rish va uni o‘tkazish to‘g‘risida”gi O‘zbekiston Respublikasi Prezident farmoyishi qabul qilindi.

Unga ko‘ra, Konstitutsiyaning 32-yilligini munosib kutib olish va yuksak saviyada nishonlash uchun “Konstitutsiya – erkin va farovon hayot garovi!” degan bosh g‘oyani o‘zida mujassam etgan tashkiliy-amaliy hamda ma‘naviy-ma‘rifiy tadbirlar tashkil etiladi.

Shuningdek, Konstitutsiya kuniga bag‘ishlangan bayram tadbirlariga tayyorgarlik ko‘rish va ularni o‘tkazish dasturi hamda tashkiliy qo‘mita tashkil etildi.

Bayramni nishonlash maqsadida quyidagi masalalarga alohida e‘tibor qaratiladi:

- yangilangan Konstitutsiya mazmun-mohiyati va “O‘zbekiston – 2030” strategiyasining asosiy ustuvor yo‘nalishlari doirasida belgilangan tub islohotlar haqida mahallalar, ta‘lim va mehnat jamoalarida ma‘rifiy uchrashuv va suhbatlar o‘tkazish;

- so‘nggi yillarda iqtisodiy, ijtimoiy, madaniy-ma‘naviy hayotning turli sohalarida amalga oshirilayotgan keng ko‘lamli islohotlar va bu borada erishilayotgan natijalarni mustahkamlashda yangi tahrirdagi Konstitutsiyaning o‘rni va rolini yoritish;

- “Konstitutsiya – erkin va farovon hayot garovi!” degan hayotiy shiorning mohiyati va ahamiyatini, yangi

tahrirdagi Konstitutsiya asosida inson huquq va erkinliklari sohasida mutlaqo yangi bosqichga o‘tilganligini ochib berish;

- mulkiy huquqlarning ishonchli himoyasini ta‘minlash, sog‘liqni saqlash, ilm-fan, madaniyat, san‘at va sport sohalarini rivojlantirish, nuroniylar, xotin-qizlar va yoshlarga doimiy e‘tibor va g‘amxo‘rlik ko‘rsatish, oila, onalik, bolalik va otalnikni himoya qilish bo‘yicha amalga oshirilayotgan islohotlarning ahamiyatini keng targ‘ib qilish;

- “Konstitutsiya oyligi” doirasida umumiy o‘rta, o‘rta maxsus, professional va oliy ta‘lim tashkilotlarida barcha o‘quvchi va talabalarni qamrab olgan holda Konstitutsiya darslarini o‘tkazish.

O‘zbekiston Respublikasi Prezidenti 17-oktabr kuni mahalliy davlat hokimiyati organlari faoliyatiga oid qonun hujjatlariga o‘zgartirishlarni imzoladi. O‘zgartirishlar Oliy Majlis Qonunchilik palatasi tomonidan 23-iyulda qabul qilindi va Senat tomonidan 20-sentabr kuni ma‘qullandi. Ular o‘tgan yili yangi tahrirda qabul qilingan Konstitutsiyaga muvofiq ishlab chiqilgan.

ASOSIY QOMUSIMIZGA MUVOFIQ ISHLAB CHIQLDI

Eng asosiy o‘zgarishlardan biri – tuman (shahar, viloyat) hokimi va xalq deputatlari kengashi raisi lavozimlari bo‘lindi. Hozirgi vaqtga qadar hokimlar tegishli hududda vakillik (kengash) va ijro etuvchi (hukumat) hokimiyatni bir vaqtning o‘zida boshqargan, bu esa hokimiyatda qo‘llab-quvvatlash va raqobat prinsipini buzgan.

Kengashlarga davlat organlari va tashkilotlarining mansabdor shaxslariga qonunlar, hududni rivojlantirish dasturlari va boshqa masalalar yuzasidan so‘rovlar yuborish vakolati berildi.

Bundan tashqari, ular inson huquq va erkinliklari, jamiyat va davlat manfaatlariga tahdid solayotgan, hududning xavfsizligi va barqaror rivojlanishi asoslariga salbiy ta‘sir ko‘rsatishi mumkin bo‘lgan fakt va voqealarni o‘rganish maqsadida tekshiruvlar o‘tkazishi mumkin.

Hokimlarga Kengashning qonunga zid qarorlarini bekor qilish uchun Senatga yoki sudga murojaat qilish huquqi berildi. Bundan oldin hokimlar qarorni qayta ko‘rib chiqish to‘g‘risida kengashga taklif bilan murojaat qilishi kerak.

Bu o‘zgarish viloyatlar va Toshkent shahar kengashlari hamda hokimlari uchun oktabr saylovidan keyin, tuman va shahar kengashlari hamda hokimlari uchun esa 2026-yil 1-yanvardan e‘tiboran kuchga kiradi.

IJTIMOIIY HIMOYAGA MUHTOJ AHOLINING HIMOYASI KUCHAYTIRILADI

Prezident tomonidan imzolangan Qonun (O‘RQ-977-son, 18.10.2024 y.) bilan ayrim qonun hujjatlarga o‘zgartirish va qo‘shimchalar kiritildi.

Qonun bilan ayrim qonunlarga ijtimoiy himoya milliy agentligining zimmasiga dafn etish uchun nafaqani berish vazifasini yuklatishga, uning xotin-qizlarni tazyiq va zo‘ravonlikdan himoya qilish sohasidagi vakolatlarini belgilashga, shuningdek fuqarolik ishlari bo‘yicha sudlarga va ma‘muriy sudlarga murojaat qilishda davlat bojini to‘lashdan ozod etishga taalluqli o‘zgartirishlar kiritildi.

Bundan tashqari, o‘zgalarning parvarishiga muhtoj bo‘lgan 80 yoshga to‘lgan keksalarga qarab

turilgan vaqt ish stajiga qo‘shib hisoblanishi uchun davolash muassasasining xulosasi talab etilmaydi, shuningdek o‘zgalar parvarishiga muhtoj bo‘lgan yolg‘iz keksalarga, yolg‘iz yashovchi keksalarga va nogironligi bo‘lgan shaxslarga shahar yo‘lovchilar transportidan bepul foydalanish huquqi berilishi nazarda tutilgan.

Shu bilan birga, umrbod ta‘minlash sharti bilan uyni (kvartirani) boshqa shaxsga berishga doir bitimlar va umrbod renta shartnomasi to‘g‘risidagi, shuningdek vasiylikdagi shaxsning mol-mulkini taqsimlashga doir bitimlar hamda uning taqdirini hal qilishga qaratilgan boshqa bitimlar haqidagi ma‘lumotlar “Inson” ijtimoiy xizmatlar markazlariga taqdim etilishi belgilandi.

O‘ZBEKISTON IQTISODIYOTI ENG TEZ O‘SAYOTGANLAR SAFIDA

Jahon banki 2024-yilda Yevropa va Markaziy Osiyo mintaqasida iqtisodiyoti eng tez o‘sayotgan mamlakatlar Gurjiston, Tojikiston va O‘zbekiston ekanini qayd etdi.

2025-yil bo‘yicha prognozlar O‘zbekiston yalpi ichki mahsulotning 5,8 foizga o‘sishi orqali mintaqada iqtisodiy o‘sinh bo‘yicha yetakchi o‘ringa chiqib olishi mumkinligini ko‘rsatmoqda.

Masalan, Rossiyada iqtisodiy o‘sinh sur‘atlarining 2024-yilda 3,2 foizgacha va 2025-yilda 1,6 foizgacha pasayishi kutilmoqda.

Mintaqaning Rossiyadan keyingi eng yirik iqtisodiyoti bo‘lgan Turkiyada iqtisodiy o‘sinh 2023-yildagi 5,1 foizdan 2024-yilda 3,2 foizgacha sekinlashishi kutilmoqda.

Jahon bankining qayd etishicha, mintaqa mamlakatlari yuqori darajadagi inflyatsiya, Rossiyaning Ukrainaga bostirib kirishi oqibatlarini va Yevropa Ittifoqida, mintaqaning asosiy eksport bozorida iqtisodiy faollik darajasining sekin o‘sishi ortidan yuzaga kelgan so‘nggi shoklarni muvaffaqiyatli yengib o‘tdi.



YALPI ICHKI MAHSULOT HAJMI IKKI BARAVARGA OSHIRILISHI MUMKIN



o‘rtacha 10 foizdan o‘sishi kerak. Inflyatsiya bo‘yicha prognozlar ham qayta ko‘rib chiqilgan.

“Prezidentimiz tomonidan davlat byudjeti taqchilligini 3 foizgacha tushirish, inflyatsiya darajasini 7 foizdan oshirmaslik vazifasi qo‘yildi. Inflyatsiya 2026-yilda 5-6 foiz darajasida saqlanishi va 2027-yildan boshlab 5 foiz va undan past bo‘lishi kutilyapti”, - deydi vazir o‘rinbosari.

2024-yil yakunlari bo‘yicha YAIM hajmi 111 milliard dollarga yetishi kutilmoqda.

2030-yilga borib O‘zbekiston 200 milliard dollarlik YAIMga ega bo‘lish uchun YAIM yiliga taxminan 10,3 foizdan o‘sishi kerak. Bu Jahon banki, Xalqaro valyuta jamg‘armasi, Osiyo taraqqiyot banki kabi xalqaro tashkilotlarning yaqin yillar uchun eng optimistik kutilmalaridan ham ancha yuqori ko‘rsatkich hisoblanadi.

Prezident yalpi ichki mahsulot hajmini 2030-yil yakunlariga ko‘ra 160 milliard emas, 200 milliard dollarga, jon boshiga YAIMni esa 4000 emas, 5000 dollarga yetkazish imkoniyatlari borligini ta‘kidladi, deya ma‘lum qildi Respublika Iqtisodiyot va moliya vaziri o‘rinbosari Ilhom Norqulov.

Bu ko‘rsatkichlarga erishish uchun O‘zbekiston iqtisodiyoti keyingi 6-yilda

MILLIY VA XALQARO HAMKORLIK

Toshkent shahridagi "O'zekspomarkaz" markaziy ko'rgazmalar majmuida "Tog'-kon ishi, metallurgiya va metallsozlik - Mining Metals Uzbekistan 2024" 18-xalqaro ko'rgazmasi bo'lib o'tdi. Bu xalqaro ko'rgazma butun dunyodan tog'-kon sanoati mutaxassislarini birlashtirgan, mustahkam milliy va xalqaro hamkorlikka yo'l ochadigan professional maydondir.

22-23-oktabr kunlari bo'lib o'tgan bu ko'rgazmada "O'zmetkombinat" AJ mutaxassislari ham ishtirok etishdi. Ushbu tadbirda qatnashish yangi mahsulotlarni namoyish etish, ishlab chiqarilayotgan mahsulotlarning raqobatbardoshligi va raqobatchilar salohiyatini baholash, investor va hamkorlar topish, hamkasblar bilan tajriba almashish imkonini beradi.

"Iteca Exhibitions" xalqaro ko'rgazmalar kompaniyasi va uning hamkori "ICAE urasia Group" tomonidan hamda Tog'-kon sanoati va geologiya vazirligi, Investitsiyalar, sanoat va savdo vazirligi rasmiy ko'magida tashkil etilgan ushbu namoyishda 19 mamlakatdan 170 dan ortiq kompaniya ishtirok etdi.

Qayd etish kerakki, O'zbekistonning tog'-kon va metallurgiya sanoati mamlakat iqtisodiyotida strategik ahamiyatga ega bo'lib, ko'plab sohalarni rivojlantirish uchun asos bo'lib xizmat qiladi. Tabiiy resurslarga boy bo'lgan zaminimiz mineral xomashyoni qazib olish va qayta ishlashni faol rivojlantirmoqda. Bunday imkoniyat nafaqat ichki ehtiyojlarni qondiradi, balki O'zbekistonning xalqaro bozorlardagi mavqeini sezilarli darajada

mustahkamlaydi.

Ko'p yillardan buyon "Mining Metals Uzbekistan" yuzlab ishtirokchi kompaniyalarni va minglab tashrif buyuruvchilarni - asbob-uskunalar ishlab chiqaruvchilari va yetkazib beruvchilarini, kon-metallurgiya xoldinglari, ilmiy doiralar va davlat idoralari vakillarini birlashtirib kelmoqda. Ushbu tadbirda ishtirok etish yangi mahsulotlarni namoyish etish, ishlab chiqarilayotgan mahsulotlarning raqobatbardoshligi va raqobatchilar salohiyatini baholash, hamkorlar topish, tajriba almashish imkonini beradi.

O'tgan yillar davomida ko'rgazma O'zbekiston kon-metallurgiya majmuasi oldida turgan muammolarni hal etishda samarali biznes platforma ekanligini isbotladi.



"QADRING BALAND BO'LSIN, ONA TILIM!"

Til - davlat timsoli, mulki, ruhi, millatning madaniy va ma'naviy boyligi, xalqning madaniyati, urf-odat, uning turmush tarzi, tarixidir. Til bor ekan millat barhayot. Tilni mo'tabar zot - onaga qiyoslanishi bejiz emas, inson o'z onasini ko'rmasdan, uning sof muhabbatini, mehrini to'ymasdan yashay olmaydi.

Mamlakatimizda o'zbek tilining davlat tili sifatidagi o'рни va ahamiyatini oshirish, uni zamon talablari asosida rivojlantirish masalasiga milliy o'zlikni anglash, millat ruhini saqlab qolish, yorug' kelajagimizni ta'minlashning eng muhim omili, deb qaralmoqda. Shu ezgu maqsad yo'lidagi amaliy harakatlar tufayli jamiyatimiz hayotida davlat tilining qo'llanish doirasi tobora kengayib, u xalq dilining chinakam ko'zrusiga aylanmoqda.

21-oktabr kuni O'zbek tili bayrami keng nishonlanishi ham ona tilimizga bo'lgan e'tiborning yorqin namunasidir. Joylarda O'zbek tili bayrami munosabati bilan ma'naviy-ma'rifiy targ'ibot tadbirlari o'tkazildi. Ana shunday tadbirlardan biri Metallurglar madaniyat saroyida bo'lib o'tdi.

"Qadring baland bo'lsin, ona tilim!" shiorida o'tkazilgan bu tadbirda "O'zmetkombinat" AJ rahbarlari, ishchi-xodimlar, harbiylar, yoshlar va jamoatchilik vakillari ishtirok etishdi. Rahbariyati tabrigidan so'ng Bekobod shahar ma'naviyat bo'limi boshlig'i Muhiddin Qo'zi-boyev, Bekobod tumani hokimining ma'naviy-ma'rifiy ishlar samaradorligini oshirish, davlat tili to'g'risidagi qonun hujjatlariga rioya etilishini ta'minlash masalalari bo'yicha maslahatchisi Saida Suvonova, Respublika ijodkor yoshlarining "Barhayot Sohibqiron" mavzusida o'tkazilgan

ko'rik-tanlov sovrindori Munira Sulton kabi mehmonlar so'zga chiqib, ona tilimiz - milliy ma'naviyatimizning bitmas-tuganmas bulog'i ekanligi haqida so'zladilar.

Tadbirda O'zbek tili bayramiga bag'ishlab tashkil etilgan ko'rik-tanlov g'olib va sovrindorlari ham taqdirlandi. Dastlab tanlovning "Davlat tili ustuvorligi ta'minlangan eng namunali tarkibiy bo'linma" yo'nalishidagi g'olib va sovrindorlar mukofotlanishdi. Unga ko'ra, 1-o'rin Ovqatlanish kombinatiga, 2-o'rin Temir yo'l xizmatiga va 3-o'rin Tajriba konstruktorlik laboratoriyasiga nasib etdi.

"Davlat tilida ish yuritish yo'lga qo'yilgan eng yaxshi tarkibiy bo'linma" yo'nalishi bo'yicha tanlovda 1-o'rinni Tog'-kon geologiya ishlari bo'limi, 2-o'rinni Ekologiya va atrof-muhit muhofazasi bo'limi va 3-o'rinni Favqulodda vaziyatlar va radiatsiya xavfsizligi bo'limi qo'lga kiritishdi.

G'olib va sovrindorlarga diplom va pul mukofoti sertifikatlarini tantanali ravishda topshirildi. Tanlovda faol ishtiroki uchun Elektrda po'lat eritish va Xalq iste'moli mollari ishlab chiqarish bo'linmalariga olti tomli o'zbek tilining izohli lug'ati kitoblari to'plami topshirildi.

Tadbir davomida Metallurglar madaniyat saroyining havaskorlari tomonidan bayram konserti dasturi tashkillashtirildi.

Bahodir RAHMONQULOV.

SUVLAR SIFATLI FILTRLANADI

Energetika bo'linmasining Filtrlash nasos stansiyasi uchastkasi jamoasi zim-malaridagi vazifalarni ko'ngildagidek bajarib kelmoqda. Uchastkaning besh nafar navbatchi mashinistlari kechayu kunduz kombinatning Navli prokat bo'linmasini, uning asosiy uskunalarini sovitish uchun uzluksiz sovuq suv bilan ta'minlab kelmoqda.

Bu uchastkada sanoat-yog'in suvlari ham qayta ishlanadi. Ya'ni ular filtrlar

orqali sifatli tozalanib, texnik suv quvuriga - kombinat ichki ehtiyoji uchun texnologiyalarga yo'naltiriladi.

Filtrlash nasos stansiyasi uchastkasining kombinat atrof-muhitining musaffoligini ta'minlashida ham munosib hissasi bor. Ularning sa'y-harakatlari bilan kombinatning yangi hududlarida sug'oriluvchi yerlar yoz mavsumida uzluksiz suv bilan ta'minlandi.



TAASSUROTLARGA BOY BO'LDI


Hamkasblar bilan dam olish mehnat jamoalari uchun nafaqat birgalikda maroqli vaqt o'tkazish, balki xodimlarni rag'batlantirish va birlashtirishning samarali vositasidir. Bunday tadbirlar tufayli ish samaradorligi oshadi, tashkilot muhiti yaxshilanadi va xodimlarning o'zaro munosabatlari yanada mustahkamlanadi.

Shu kabi omillarni inobatga olgan holda, "O'zmetkombinat" AJ Kasaba uyushmasi qo'mitasi tomonidan xodimlar uchun esda qolarli jamoaviy hordiq tashkillashtirilishi a'nanaga aylangan.

Ana shunday tadbirlardan biri 19-20-oktabr kunlari tashkil etildi. Shu kunlari 40 nafar kombinat ishchi-xodim-

lari uchun bepul avtobus ajratilib Samarqand shahriga sayohat tashkil etildi. Ikki kunlik sayohat davomida metallurglar "Ochiq osmon ostidagi muzey" deb tan olingan "Registon maydoni"ning obidalarini aylanishdi. Ko'hna va navqiron shaharning tarixiy obidalarini, serjilo me'moriy manzaralari bilan yaqindan tanishdilar. Shuningdek, shaharning tarixiy qadamjolarini ziyorat qilishib, qiziqish bilan tomosha qilishdi. Ularning tarixi haqida ma'lumotga ega bo'ldilar.

Dam olish kunlari tashkil etilgan ushbu sayohat ishchi-xodimlar uchun munosib sovg'a bo'ldi.



OCHIQ SAYYOR SUD MAJLISIDA

SO'NGGI PUSHAYMON O'ZINGGA DUSHMAN

Jinoyat ishlari bo'yicha Bekobod shahar sudi 20-avgust kuni o'z binosida, ochiq sayyor sud majlisida Ma'mur Ilhomov va Sodirbek Xolboyevga (ism va familiyalar o'zgartirilgan) nisbatan to'plangan ma'muriy ishni ko'rib chiqdi.

Huquqbuzar Ma'mur Ilhomov tomonidan 2024-yil 22-iyul kuni soat 22:45larda "O'zmetkombinat" AJ hududida xizmat olib borayotgan vaqtida, sumkalarda umumiy narxi 195 721,50 so'm bo'lgan 18 kilogramm rangli metall parchalarini yashirin ravishda talon-taroj qilinayotgani aniqlangan.

Sud majlisida huquqbuzar tariqasida so'roq qilingan Ma'mur Ilhomov o'z aybiga iqrorlik bildirdi. Haqiqatdan ham u oldin "O'zmetkombinat" AJda qo'riqchi bo'lib ishlaganligi, 22-iyul kuni kombinat hududida joylashgan 12 va 13-sonli xizmat postlariga qoravullik qilganini bildirdi. Soat 22:30larda operator tomonidan unga chiqib ketayotgan vagonni kuzatib borish topshirig'i beriladi. Uning sudda aytishicha vagonni kuzatib ketayotganida yo'ldan ichida metall chiqindilari bo'lgan 2 ta sumkani topib olgan. U bu sumkalarni

olib ketmoqchi bo'lgan. Shu atrofda qo'riqchilik qilayotgan Sodirbek Xolboyevga telefonda smena boshlig'iga tusha olmaganligi, ularni kombinatga topshirish uchun biroz nariroqqacha ko'tarishib borishda yordam so'ragan.

Rangli metall parchalarini kombinatga sumkalarda ko'tarib olib ketayotganlarida smena boshlig'i kelib qolgan. Ularning qo'llaridagi sumkalarni ochib ko'rib, xodimlarni chaqirib, bayonnoma rasmiylashtirishgan. Ma'mur Ilhomov qilgan ishidan chin ko'ngildan pushaymondaligi, boshqa bu holat takrorlanmasligini aytib suddan unga nisbatan yengillik berishni so'radi.

Sudda so'roq qilingan Sodirbek Xolboyev o'z aybiga iqror bo'lmadi. Ilhomovning harakatlarida noqo-



nuniy holat alomatlarini ko'rmagani sababli unga yordam berganini, aniqlangan rangli metall parchalari noqonuniy olib chiqib ketilayotganidan umuman xabari bo'lmagan haqida ko'rsatuv berib, suddan unga yordam berishni so'radi.

Sud, ish hujjatlari bilan tanishib chiqib, huquqbuzar Ma'mur Ilhomovning aybi, uning sud majlisida bergan ko'rsatuvidan tashqari, ishda mavjud bo'lgan guvohlarning yozgan tushuntirish xatlari, hodisa sodir bo'lgan joyni ko'zdan kechirish va daliliy ashyoni olish bayonnomasi, ma'muriy bayonnoma hamda to'plangan ish hujjatlariga asosan to'liq o'z isbotini topgan deb hisobladi.

Sud ish hujjatlari bilan tanishib, Sodirbek Xolboyevning sud majlisida bergan ko'rsatuvini tinglab, dastlabki surishtiruv organi tomonidan uning harakatlari O'zbekiston Respublikasi MJtKning 61-moddasi 1-qismi bilan noto'g'ri kvalifikatsiya qilingan, uning huquqbuzarlik sodir etganligini tasdiqlovchi dalillar aniqlanmagan va ish hujjatlariga birlashtirilgan deb hisobladi.

Ma'muriy huquqbuzarlik to'g'risi-



dagi ishning Sodirbek Xolboyevga nisbatan O'zbekiston Respublikasi MJtKning 61-moddasi 1-qismi bilan yuritilgan qismi O'zbekiston Respublikasi MJtKning 271-moddasi birinchi bandiga asosan tugatildi.

Huquqbuzar Ma'mur Ilhomov esa O'zbekiston Respublikasi MJtKning 61-moddasi 1-qismida nazarda tutilgan huquqbuzarlikni sodir etganlikda aybli deb topildi. Unga shu moddaga asosan bazaviy hisoblash midorining 1 baravari - 340 000 so'm jarima jazosi qo'llandi.

Farhod ZOKIROV,
Jinoyat ishlari bo'yicha Bekobod shahar sudi sud'yasi.

* MULOHAZA * MULOHAZA * MULOHAZA * MULOHAZA * MULOHAZA * MULOHAZA * MULOHAZA * MULOHAZA * MULOHAZA *

OXIRI AYANCHLI YAKUNLANADI

TANGANING IKKINCHI TOMONI

Tezkorlik bilan rivojlanayotgan hayotimizni bugungi kunda internet va ijtimoiy tarmoqlarsiz tasavvur qilib bo'lmaydi. Qo'limizdagi telefonlar eng qulay dastyorga aylandi. Bir qarashda ularning ziyoni yo'qdek, barcha barchasi insonning foydasini ko'zlab ixtiro qilingandek ko'rinadi. Ammo tanganing ikkinchi tomoni bo'lgani kabi, bu mobil o'yinlarning ham inson hayotini butkul izdan chiqaradigan, hatto ularning o'limiga sababchi bo'ladigan elektron qimor kabi turlari bor.


Har qanday ijtimoiy tarmoqdan foydalanmoqchi bo'lsangiz lip etib, "o'ynang va millionerga aylaning" deya o'zini reklama qilayotgan



kazino, ya'ni onlayn totalizator yoki boshqacha aytganda qimor o'yinlari chiqadi. Ular odamni o'ziga jalb qilaveradi.

Keyingi paytlarda ijtimoiy tarmoqlarda internetdagi tavakkalchilikka asoslangan qimor o'yinlarining ayanchli oqibatlari haqida turli xabarlar tarqalmoqda. Bu xabarlar asosan turli ko'ngilsizlik, ayniqsa, fojiali voqealardan iborat ekani sog'lom fikrli, hayotga ochiq ko'z bilan qaraydigan har bir kishini tashvishga soladi.

Aytish kerakki, tavakkalchilikka asoslangan o'yinlar insonda umidsizlik va nochorlik hissini keltirib chiqaradi. Totalizatorlarda katta mablag'ni yutqazib qo'yganlar duch kelayotgan moliyaviy qiyinchiliklar sabab ular tomonidan sodir etilayotgan huquqbuzarlik va jinoyatlar soni ko'paymoqda. Bundan tashqari yirik miqdordagi mablag'ni yutqazish, chorasizlik esa hatto o'z joniga qasd qilishgacha olib borishi mumkin.



ONLAYN QIMOR

Onlayn qimor - totalizator biror yo'nalish yoki o'yinda qaysidir tarafning boshqa, raqib tomoni ustidan zafar quchishini taxmin qilib, o'zi ishongan ma'lum bir shaxs yoki jamoaga pul tikishdir. Aniqrog'i, onlayn kazino, yana ham soddalashtirsak - qimor.

Totalizator o'yinlari juda osonlik bilan ruhiy xastalikka aylanaadi. Bu holat fan tilida "ludomaniya" deb nomlanadi. Inson onlayn pul tikish o'yinlarini o'ynay boshlagach, xuddi, narkotikka bog'lanib qolgandek pul tikishga o'rganib, irodasidan mahrum bo'ladi. Inson shu darajaga keladiki, qimor quliga aylanadi, o'zini boshqara olmay qoladi. Totalizatorning qurbonlari oilasi, kerak bo'lsa, yaqin insonlari va do'stlarining ham pulini onlayn o'yinlarga tikib yuboradi. Shu ham yetmagach, qarzlari, kreditlari ola boshlaydi va o'zini tubi yo'q jarga uloqtirganini bilmay qoladi.

Dinimizda insonlar halol mehnat qilib pul topishga buyurilgan. Birovni aldab, xiyonat qilib, mutahamlik yo'li bilan uning mulkiga ega bo'lish haromdir. Qimor esa aynan shunday yo'l bilan pul topishdir.

O'ZINI TO'XTATA OLMAYDI

E'tibor bersak, turli totalizatorlar orqali pul topishga urinayotganlarning aksariyati yoshlardir.

Bir tanishimning o'g'li "1xbet.net" totalizatorida qimor o'ynar ekan. U katta miqdorda pul yutib olardi. Dadasiga "Lasetti", o'ziga bahosi 100 ming dollardan ham qimmat bo'lgan mashina sotib oldi. Uylar ham oldi. Tadbirkorlik ishlarini ham boshlamoqchi bo'lib turganda katta miqdorda mablag' yutqazdi.

Natijada nafaqat o'zining mashinasi, uyi, dadasiga sovg'a qilgan avtomobilni ham sotadi. Tanish-bilishlaridan ham qarz oladi. Ularning ham hammasini yana yutqazadi.

Endi qarzlarni to'lay olmay odamlardan qochib yuribdi. Bir kishining qimorbozligi ortidan uning o'zi ham, atrofidagi odamlar ham jabr ko'rmoqda. Buning ustiga uning hayotida yolg'onchilik, firibgarlik kabi salbiy xislatlar odatiy holga aylanib qolgan.

Yoshlarning sog'lom hayotiga tajovuz qiladigan, ularni to'g'ri yo'ldan adashtiradigan bunday illatlardan farzandlarimizni himoya qilishimiz kerak. Har bir bolaning dunyoqarashida, ong-shuurida bu illatlarga qarshi immunitetni shakllantirish, ularga onlayn qimor va tavakkalchilikka asoslangan boshqa o'yinlar inson hayotini barbod qilishi, bularning oqibati afsusnadamat, pushaymonlik va hatto fojiali tugashini tushuntirishimiz lozim. Shundagina bunday illatlarga chek qo'yiladi.

Ismat DIYOROV.

OLTI OY ISHLAMASDAN HAM TA'TIL OLSA BO'LADIMI?

Voyaga yetmagan ikkita farzandimni yolg'iz tarbiyalayman. Oilaviy sababga ko'ra ishga kirganimga 3 oy bo'lganda mehnat ta'tiliga chiqish uchun ariza yozdim. Biroq uzluksiz olti oy ishlaganingizdan keyin ta'til olishingiz mumkin, deb arizamni qanoatlantirishmadi. Shu to'g'rimi?

K. Azizova.

Mehnat Kodeksining 227-moddasiga asosan birinchi ish yili uchun har yilgi mehnat ta'tilidan foydalanish huquqi xodimda u ushbu ish beruvchida uzluksiz ishlagan olti oy o'tganidan keyin yuzaga keladi.

Biroq agar xodim ariza yozsa ish beruvchi olti oy o'tmay xodimga ta'til berilishi shart bo'lgan holatlar ham bor. Yuqoridagi moddaning 3-qisimga ko'ra o'n to'rt yoshga to'lmagan bitta yoki undan ortiq bolani (o'n olti yoshga to'lmagan nogironligi bo'lgan bolani) tarbiyalayotgan shaxslarga (yolg'iz ota-onaga, shu jumladan beva ayollarga, beva erkaklarga, nikohdan ajralganlarga, muddatli harbiy xizmatdagi harbiy xizmatchilarning xotinlariga, ota-onaning

o'rnini bosuvchi shaxslarga) olti oy muddatdan avval ham mehnat ta'tili berilishi mumkin. Agar farzandlaringizdan eng bo'lmaganda biri o'n to'rt yoshga to'lmagan bo'lsa ham Sizga mehnat ta'tili berilishi shart.


Shuningdek, ayollarga - homiladorlik va tug'ish ta'tilidan oldin yoki undan keyin, o'n sakkiz yoshdan kichik bo'lgan shaxslarga, rezervga bo'shatilganidan keyin uch oydan kechiktirmay ishga kirgan muddatli harbiy xizmatni o'tagan sobiq harbiy xizmatchilarga,



I va II guruh nogironligi bo'lgan xodimlarga, ishdan ajralmagan holda ta'lim tashkilotlarida o'qiyotganlarga, o'zining har yilgi mehnat ta'tilini imtihonlar, sinovlar (zachyotlar) topshirish, bitiruv malakaviy ishlarini, magistrlik dissertatsiyalarini, kurs, laboratoriya ishlarini va boshqa o'quv ishlarini bajarish vaqtiga to'g'rilab olishni xohlaganlarga birinchi mehnat yillari uchun olti oy o'tmay ta'til beriladi.

Bundan tashqari jamoa kelishuvlarida, shuningdek jamoa shartnomasida yoxud ichki hujjatlarda belgilangan boshqa hollarda boshqa xodimlarga ham mehnat ta'tili ishga kirganidan olti oy bo'lmasdan berilishi mumkin.

Bir narsaga e'tibor berish lozimki yuqoridagi xodimlar olti oy o'tmay mehnat ta'tiliga ariza yozgan taqdirda ularning ta'tili to'liq davomiylikda va to'liq haq to'lagan holatda beriladi. Masalan, farzandingiz 14 yoshga to'lmagan holda ishga kirganingiz holda bir hafta o'tgandan so'ng yillik mehnat ta'tilini olish uchun ariza yozsangiz ham ish beruvchi Sizga arizangizni rad qilishga haqli emas. Bunday holatlarda xodimlarga to'liq mehnat ta'tili davomiylikda ta'til beriladi va to'liq ta'til puli to'lanadi.



ISH HAQI SAQLANADIMI?

Agar xodim majburiy malaka oshirishga yuborilsa, ish haqi va ustamalar saqlanib qolinadimi?

K. Karimboyev.

Mehnat kodeksining 370-moddasi uchinchi qismiga ko'ra xodim ish beruvchi va xodim uchun majburiy bo'lgan qayta tayyorlashga yoki malaka oshirishga yuborilgan taqdirda, ish beruvchi qayta tayyorlash yoki malaka oshirish davrida xodimning ish joyini (lavozimini) va o'rtacha ish haqini saqlab qolishi shart.

Mana shu qoidaga binoan xodim majburiy malaka oshirishga jalb qilinganda, uning o'rtacha oylik ish haqi to'lanadi. Bunda Mehnat kodeksining 257-moddasiga asosan xodimning o'rtacha oylik ish haqi hisoblanadi.

Ushbu moddaning uchinchi qismiga ko'ra Mehnatga haq to'lashning vaqtbay tizimidagi xodimlarning o'rtacha ish haqi xodimning o'rtacha ish haqi saqlanib qoladigan oydan oldingi oxirgi kalendar oy uchun tarif stavkasi (lavozim maoshi) miqdoridan kelib chiqib, xodimning o'rtacha ish haqi saqlanib qoladigan oydan oldingi o'n ikki kalendar oy uchun ustamalar, mukofotlar va boshqa to'lovlar (ushbu Kodeks 248-moddasining uchinchi qismida nazarda tutilgan ish haqining qo'shimcha qismi) summasining o'n ikkidan bir qismi o'rtacha ish haqiga jamlangan holda belgilanadi.

Mana shu qoidaga ko'ra xodimning ustamalari uning o'rtacha ish haqini hisoblashda qo'shiladi.

SO'KINISH UCHUN JARIMA TO'LANADIMI?

Jamoat joylarida, shu jumladan ishxonalarda ham so'kinganlik uchun qonunda jazo belgilanganmi?

B. Dilshodov.

O'zbekiston Respublikasining Ma'muriy javobgarlik to'g'risidagi kodeksning jamoat tartibiga tajovuz qiluvchi huquqbuzarliklar uchun ma'muriy javobgarlik belgilangan. Unga asosan mayda bezorilik, ya'ni jamoat joylarida uyatli so'zlar bilan so'kinish, fuqarolarga haqorat-muz shilqimlik qilish hamda jamoat tartibini va fuqarolarning osoyishtaligini buzuvchi shu kabi boshqa xatti-harakatlarda ifodalangan jamiyatda yurish-turish qoidalarini qasddan mensimaslik uchun jazo jorolari qo'llaniladi.

Kodeksning Mayda bezorilik deb nomlan-



gan 183-moddasiga asosan bunday huquqbuzarlik uchun Bazaviy hisoblash miqdorining 3 baravaridan 5 baravarigacha miqdorda (1 mln. 125 ming so'mdan 1 mln. 875 ming so'mgacha) jarima yoki 15 sutkagacha muddatga ma'muriy qamoq jazosi berilishi mumkin.

TIZIM 2025-YIL 1-MARTDAN ISHGA TUSHADI

O'zbekistonda 1-iyundan boshlab avtotransport vositalaridan chiqadigan zararli chiqindilarni kamaytirish maqsadida "Ekologik transport" tizimi bosqichma-bosqich joriy etilishi aytilgan edi. Biroq nega bu tizim ishga tushmadi?

K. Ismoilov.

2024-yil 29-martda hukumatning qabul qilingan tegishli qaroriga muvofiq, atmosfera havosining haqiqiy ekologik holatidan kelib chiqib, hududlar "toza" (yashil), "o'rta" (sariq) va "zararli" (qizil) ekologik zonalarga bo'linishi belgilangan. Bu qarorga asosan avtotransport vositalari diagnostika natijalariga ko'ra transport vositalariga ekologik stikerlar beriladi. Ekologik toifasi muayyan hududning ekologik zonasiga to'g'ri kelmaydigan transport vositalari uchun ekologik kompensatsiya, ayrim ekologik zonalarga kirishni cheklash yoki taqiqlash joriy etilishi ko'rsatib o'tilgan edi.

O'zbekiston Respublikasi Vazirlar Mahkamasi-ning 2024-yil 3-iyuldagi 381-sonli "O'zbekiston Respublikasi hukumatining ayrim qarorlariga so-



halar va tarmoqlarda ekologik vaziyatni yaxshilashga qaratilgan o'zgartirishlar va qo'shimchalar kiritish to'g'risida"gi qaroriga ko'ra, barcha toifalardagi avtomototransport vositalaridan ifloslantiruvchi moddalar tashlamalarining atmosfera havosiga zararli ta'siri bo'yicha yo'l qo'yiladigan normativlarga mosligini nazorat qilish bo'yicha "Ekologik transport" tizimini joriy qilish muddati 2025-yil 1-martga qadar uzaytirildi.

Savollarga huquqshunos Inomjon ESHONQULOV javob berdi.

OB-HAVO SOVUSHI BILAN QAYSI KASALLIKLAR AVJ OLADI?

Sovuq va nam havo qator surunkali va mavsumiy kasalliklar avj olishiga sabab bo'ladi. Buning asosiy sababi immunitet zaiflashishi bilan bog'liq. Chunki salqin va yomg'irli kunlar boshlangach, havoda namlik darajasi ortib, organizmning virus va infeksiyalarga qarshi kurashish qobiliyati pasayadi.

Bu mavsumda eng ko'p uchraydigan kasalliklar quyidagilar:

O'RVI, gripp, LOR xastaliklari, sistit, pielonefrit (buyrak yallig'lanishi), herpes, surunkali bo'g'im kasalliklari, oshqozon va o'n ikki barmoqli ichak yarasi, mavsumiy allergiya, dermatoz, asab va ruhiy kasalliklar.

Masalan, kuz oylarida immunitet susayishi hisobiga organizm nafaqat viruslar, hatto sovuq harorat ta'siriga ham yetarli darajada qarshilik ko'rsata olmasligi

mumkin.

Angina, faringit, tonsillit, laringit, traxeit, bronxit, rinit, sinusit, otit kabi LOR kasalliklari, O'RVI shu tariqa yuzaga keladi. O'z navbatida, shamollash bilan birga, ba'zan lablar atrofida girpes paydo bo'ladi.



Salqin havo ta'sirida kuchayadigan yana bir xastalik sistitdir. Chunki quviq va peshob yo'llari infeksiyasi aynan kuzda avj oladi. Xastalik o'z vaqtida davolanmasa, pielonefrit (buyrak yallig'lanishi) kelib chiqishi xavfi oshadi.

Mavsum o'zgarishi, organizmda vitaminlar yetishmovchiligi, endokrin buzilishlar, noto'g'ri ovqatlanish va stress kabi omillar tufayli oshqozon yarasi bezovta qilishi ehtimoli bor.

Sovuq va nam havo bo'g'im kasalliklari qo'zg'alishiga ham sabab bo'lishi mumkin.

Albatta, buning oldini olsa bo'ladi! Eng samarali chora – immunitetni mustahkamlash.

Immunitet – lotinchada "ozodlik" ma'nosini bildiradi. U organizmni bakteriya va viruslar, zamburug'lardan himoya qiladi, ularga qarshilik ko'rsatadi.

IMMUNITET PASAYISHIGA OLIB KELUVCHI OMILLAR

Immunitet pasayishining sababi sovuq va nam havodan tashqari turmush tarzi va odatlarda bo'lishi mumkin. Shifokorlar quyidagi uning sabablarini ko'rsatishdi.

NOTO'G'RI OVQATLANISH. Qondagi antitanalar immunoglobulinlar oqsilidan tarkib topgan, ularning me'yorda ishlab chiqarilishi uchun taomnomada go'sht, tuxum, baliq, sut mahsulotlari, dukkakli o'simliklar yetarlicha bo'lishi kerak.

SURUNKALI STRESS. Asabiy charchoq paydo bo'lganda immunitetni himoya qilish faoliyatini tartibga soluvchi gormonal tizim ishdan chiqadi, natijada immunitet zaiflashadi.

SURUNKALI UYQUSIZLIK.

ZARARLI ODATLAR. Chekish, spirtli ichimliklarni iste'mol qilish, semirish, kam harakat hayot tarzi.

TASHQI MUHIT. Zararli ishlab chiqarish korxonalari, havoning ifloslanishi, radiatsiya.

YASHASH JOYIDAGI HAVODA NAMLIKNING YETISHMASLIGI. Qishda, isitish qurilmalari ishlagan mavsumda xona ichidagi havo juda quruq bo'ladi. Bu shilliq parda va teri qurishiga sabab bo'ladi va immunitetni zaiflashtiradi. Quruq havo gaplashganda, yo'talganda tarqaladigan virus va mikroorganizmlarning zarralarini uzoq vaqt davomida saqlaydi.

PASAYGAN IMMUNITET BELGILARI

Tez-tez kasallanish – yil davomida 3-4 marta shamollash.

Doimiy xasta bo'lish – agar immunitet mustahkam bo'lsa, har qanday shamollash tezda o'tib ketadi. Organizm keskin himoya choralari qo'llab, virus va bakteriyalarni tez yengadi.

Ichaklar holati – disbakterioz belgilari – qabziyat va diareya almashib turishi, qorin damlanishi, tez-tez ko'ngil aynashi.

Teri – tez-tez qaytalanuvchi toshma, yiringli yara, uchuq toshib turishi.

Umumiy ahvol – holsizlik, quvvatsizlik,



mehnat unumdorligining pasayishi.

Allergik kasalliklar.

Yetarlicha uxlash bilan ham uyquga to'ymaslik.

Soch va tirnoqlarning mo'rtlashishi.

Limfa bezlarining kattalashishi.

QANDAY QILIB IMMUNITETNI MUSTAHKAMLASH MUMKIN?

Shifokorlarning immunitetni oshirish uchun bergan tavsiyalarini hamma bilishi va amal qilishi foydadan holi bo'lmaydi.

RATSIONGA VITAMINLAR QO'SHISH

Immunitetni mustahkamlovchi maxsus vitaminlar va minerallarni kapsula yoki qo'shimchalar sifatida qabul qilish mumkin, ammo oziq-ovqat tarkibidagi mikroelementlar organizmga ko'p foyda keltiradi.



Sut, go'sht mahsulotlari, sabzavot va mevalar, dukkaklilar va yong'oqlar immunitetni mustahkamlovchi ozuqa moddalariga to'la. C vitamini bu masalada, ayniqsa, samarali hisoblanadi, shuning uchun qishda va mavsumdan tashqari sitrus mevalari, ismaloq, kivi va klyukva sog'lom ovqatlanishni qo'llab-quvvatlaydi. Shuni unutmaslik kerakki, sog'lom jigar tabiiy detoksifikatsiya jarayonini ta'minlaydi, unga karam, brokkoli kabi sabzavotlar yordam beradi. Immunitet tizimini mustahkamlovchi boshqa mahsulotlar qatorida parhezshunoslar yogurt, bulg'or qalampiri, tovuq go'shti, asal, sarimsoq, zanjabil, zarchavani tavsiya qiladi. Shuningdek, anor, olma, limon, qatiq, piyoz, qovoq, burukli karami, qora sedanani muntazam tanavvul qilish koni foyda.

SHIFOBAXSH DAMLAMALAR ICHISH

Dorivor gilyoh, rezavor va ko'katlar nafaqat



viruslarga qarshi kurashishga yordam beradi, balki tuzalishni ham tezlashtiradi. O'simlik choylari, mevali ichimliklar va kompotlar immunitetni mustahkamlashdan tashqari viruslardan ham himoya qiladi. Bundan tashqari, chereda (ittikanak), moychechak, ko'k choy, zanjabil, quritilgan yerba mate barglari, qizil miya ildizi damlamalari immunitetni ko'tarishda qo'l keladi.

SPORT BILAN SHUG'ULLANISH

Muntazam jismoniy mashqlar immunitet tizimiga ijobiy ta'sir ko'rsatishi ilmiy jihatdan isbotlangan. Jismoniy mashqlar begona yoki shikastlangan hujayralarni yo'q qilish orqali organizmni infeksiyalardan himoya qiluvchi T-limfotsitlarni safarbar qiladi.

UYQU SIFATINI OSHIRISH

Uyquning yetishmasligi ham T-hujayralarining faolligini pasaytiradi, immunitetni va emlash vaksinalarining ta'sirini zaiflashtiradi. Belgilangan 7-8 soat uxlashga harakat qilish, bir vaqtda yotishga odatlanish tavsiya etiladi.

QUYOSHDA YURISH

D vitamini sog'lom immunitet tizimi uchun zarurdir, chunki u organizmga antitola ishlab chiqarishga yordam beradi. Uning yetishmasligi olimlar tomonidan nafas olish kasalliklarining asosiy sabablaridan biri sifatida tan olingan. Har kuni 10-15 daqiqalik yurish immunitetni mustahkamlash va viruslardan himoya qilish uchun zarur bo'lgan me'yorni ta'minlaydi.

KO'P SUYUQLIK ICHISH

Suv iste'molining standart darajasi kuniga 1,5-2 litrni tashkil qiladi. Toza ichimlik suvining afzalliklari haqida hamma biladi, u organizmni namlik bilan ta'minlaydi, tozalaydi, qo'llab-quvvatlaydi va umuman, hech qanday zarari yo'q. Bundan tashqari, spirtli ichimliklarni iste'mol qilish yaxshi natija bermasligini hamma biladi, u immunitet tizimining ishiga putur yetkazadi.

YOMON ODATLARDAN VOZ KECHISH

Chekish, spirtli ichimliklarni iste'mol qilish, kam harakat organizmda ateroskleroz, nafas yo'llari yallig'lanishi, miyada qon aylanishi kamayishiga olib keladi. Bular hammasi immun tizimini kuchsizlantiradi.

HAYOTGA IJOBIY MUNOSABAT

Agar hayot odamga quvonch va zavq keltirmasa, o'z-o'zini yo'q qilishning biologik mexanizmlari ishga tushadi. Hayotga ijobiy qarash va har qanday yomon vaziyatda ham tushkunlikka tushmaslikka harakat qilish kerak. Bo'lib o'tayotgan voqealarga munosabatni ijobiyga o'zgartirishda psixolog bilan maslahatlashish mumkin.

FUTBOL: SUPERLIGA* FUTBOL: SUPERLIGA* FUTBOL: SUPERLIGA* FUTBOL: SUPERLIGA* FUTBOL: SUPERLIGA* FUTBOL: SUPERLIGA*



O'YINGA MOS NATIJA...

19-turda "Paxtakor"ni 3:2 hisobida yenggan "Metallurg"dan keyingi turda muxlislar yana g'alaba kutishgan edi. Amaldagi chempionga qarshi uchrashuvda qayd etilgan natija va o'yin "Metallurg" muxlisleri qalbini ilitgan hamda jamoa musobaqa jadvalida oxirgi o'rinda borayotgan bo'lsada uning kelajagiga umid uchqunlarini alangalatgan edi. Afsuski, umid oqlanmadi.

Superliganing 20-tur doirasida bekobodliklar singari xavfli mintaqada borayotgan "Qizilqum" bilan Qarshida kechgan bahsda esa hali bartaraf etilishi lozim bo'lgan muammolar ko'p ekanligi oydinlashdi. Jamoa raqib tomonidan 2-daqiqada o'rtaga tashlangan savolga bir yarim soat davomida javob topolmagani ancha xavotirli. Olti ochkolik o'yinda boy berilgan qimmatli ochkolar qadri kuz oxirida qimmatga tushmasa bo'lgani...

Xuddi "Paxtakor" bilan o'yindagi singari "Metallurg" yana tezkor gol o'tkazib yubordi. Kerim Palichning jarima maydoni yaqinidagi pala partish harakati va zarurati bo'lmagan paytda qoida buzishi o'yindagi yagona golga olib keldi. "Metallurg" standart vaziyat qurboniga aylandi. Jarimadan uzatilgan to'pni himoyachilarimiz ta'qibidan xoli qolgan raqibning bo'ychan hujumchisi Elguja Lobjanidze Dragan Cheran singari xotirjam boshi bilan urib darvozamiz to'riga tushirdi. Biz esa "sherlar"ga qarshi o'yindagi kabi yana ta'qibchi rolga tushib qoldik va bu chohdan chiqib keta olmadik. Bunda jamoa o'yinchilaridagi charchoq, boshlang'ich tarkibdagi majburiy o'zgarishlar, futbolchilarning psixologiyasi, yaratilgan vaziyatlardan foydalana olmaslik va hokazo muammolar sabab bo'ldi.

"Metallurg" tezkor golga 15-daqiqadayoq tezkor javob qaytarishi mumkin edi. Biroq jamoaning legioner hujumchisi Balsha Sekulich ikki uch metrlar olislikdan to'pni darvozaga to'g'rilab qo'ya olmadi. Bu butun birinchi taym mobaynida ega bo'lgan yagona gollik imkoniyatimiz edi. Ikkinchi bo'limda esa bosimni oshirdik. Vaziyatlar soni ham ko'paydi. Jamoa sardori Zabixillo O'rinboev sheriklarini ortidan ergashtirishga urindi. O'zi xavfli zarbalar berdi. Biroq shu kuni jamoaning omadi chopmadi. Buning omillari esa murabbiylar shtabi tomonidan jiddiy tahlil etilishi kerak. G'alvirni sudan ko'taradigan payt keldi. Bu yog'iga har bitta uchrashuv hayot-mamot "jangi"ga aylanmas ekan, qiya ochilib turgan Pro liga eshiklaridan o'pqonga tushib ketish xavfi ortib boraveradi...

HISOB OCHILMADI

Superliganing 21-turida 19-oktabr kuni O'zbekiston kubogi - 2024 sohibi - "Andijon" futbol klubini Olmaliq shahrida qabul qilgan Bekobodning "Metallurg" jamoasi navbatdagi nursiz durangga imzo chekdi - 0:0.

Bu natija esa Superligada mavqeini saqlab qolishga harakat qilayotgan jamoamizning ahvolini yanada og'irlashtirdi. Oy boshida kubokni boshi uzra baland ko'targan "Andijon"ga qarshi bahsni bekobodliklar tezkor hujumlar bilan boshlagandi. Ammo jamoaning shashti birinchi taymning o'rtalarigacha yetdi.

O'yin avvalidagi zazyiqni bartaraf etgan vodiyliliklar asta-sekin tashabbusni ham o'z

qo'lga olishga urinib ko'rdi. Ayniqsa, standart vaziyatlardan foydalanish borasida Superliga yetakchilaridan biri sanaluvchi andijonliklar taymlar oxirini ancha ko'tarinki kayfiyatda o'tkazdi. Ayrim holatlarda "Metallurg" himoya chizig'i va ayniqsa, darvozabon chinakamiga ter to'kishga majbur bo'ldi. Birinchi taymda hududiy ustunlik bekobodliklar tomonida bo'ldi.

Ikkinchi taymni esa andijonliklar ishonchli o'tkazdi. Ammo har ikkala jamoa hujumdan ko'ra o'z darvozasi dahlsizligini ko'proq o'ylaganligi bois ham muxlislar bu o'yinda gol ko'rishmadi.



IMKONIYAT BOY BERILDI

26-oktabr kuni Superliganing 22-turini safarda "Navbahor" jamoasiga qarshi o'tkazgan Bekobodning "Metallurg" jamoasi mavsumdagi navbatdagi mag'lubiyatini qabul qilib oldi. Bugal raqib deyarli bitta taym maydonda bir kishi kam bo'lib o'ynasada, uchrashuvni ijobiy natija bilan yakunlashni futbolchilarimiz eplay olishmadi.

Dastlabki daqiqalardan o'q jangovor kayfiyatda maydonga tushgan mezbonlar ketma-ket xavfli hujumlari bilan darvozamiz sari xavf solib turdi. Birinchi taymning o'zida maydon egalari kamida ikkita yuz foizlik gollik imkoniyatlar bo'ldi. Taym so'nggiga kelganda Abror Ismoilovning maydondan chetlatilishi "Metallurg"ning ijobiy natija

uchun imkoniyatlarini oshirgandi. Afsuski, son jihatidan ko'p bo'lib harakat qilgan bekobodliklar hisobni ochish uchun bir qator vaziyatlardan foydalana olishmadi. Natijada sen gol urmasang senga urishadi degan ibora yana o'z isbotini topdi. 79-daqiqada namanganliklar standart vaziyatdan unumli foydalanishdi. Jarimadan uzatib berilgan to'pni Yovan Jokich boshi bilan urib darvoza to'riga tushirdi. "Metallurg"ning mag'lubiyatdan qutilib qolish yo'lida jon kuydirishlari esa samara bermadi...

23-turda "Metallurg" 31-oktabr kuni OKMKga qarshi yashil maydonga tushadi.

Komiljon JUMAYEV.

AYOLLAR BIRINCHI LIGASI

BIRIDA YAXSHI, BOSHQASIDA AKSI

Futbol bo'yicha ayollar birinchi ligasi o'yinlarida "Metallurg - W" barqaror ishtirok etolmayapti. Jamoa bir qator o'yinlarda maydonga tushib, birida yaxshi, boshqasida aksi o'yinlar ko'rsatmoqda.

12-tur o'yinlarida "Metallurg - W" safarda "Surxon - W" jamoasi bilan kuch sinashdi. Bu o'yinda maydon egalari 4:2 hisobida g'alaba qozonishdi. Shu o'yindan so'ng jamoa ketma ket uch marta g'alaba qozondi. 13-turda "Sho'rtan - W" - 3:1, safar o'yinlarida 14-turda "Mash'al - W" 1:5, 15-turda

"Sho'rtan - W" 0:8 yirik hisoblarida taslim qilindi. Afsuski, jamoa 16-turda imkoniyatni boy berdi. Mavsumning oxirigi o'yinida esa "Mash'al - W" 8:1 hisobida mag'lub etildi.

Birinchi ligada mavsum yakuni bo'yicha "Metallurg - W" 7 g'alabaga erishdi. 1 o'yinni durang va 9 uchrashuvni mag'lubiyat bilan yakunladi. Bu o'yinlarda raqiblari darvozalariga 53 ta gol urib, o'z darvozasidan 25 bor to'p olib chiqdi. 22 ochko jam'argan jamoa musobaqa jadvalida 8 ta jamoa orasida 6-o'rinni egalladi.

ISLOM KUMUSH MEDAL SOHIBI


Yaqinda Kiprning Larnaka shahrida sambo bo'yicha yoshlar, o'smirlar va kadetlar o'rtasidagi jahon chempionati bo'lib o'tdi. Bahslar umumiy hisobda 55 ta vazn toifasida o'tkazildi.

O'zbekiston terma jamoasi bellashuvlarda bosh murabbiy Roman Shakirov, murabbiylar Guldon Ro'ziyeva, Dmitriy Kamenskiy boshchiligida ishtirok etishdi.

Hamyurtimiz Islom Adilov mazkur jahon chempionatida bosh hakam sifatida ishladi. Shuningdek, Rustam Adilov va Oybek Fayziboyev hakam sifatida faoliyat olib borishdi.

Ushbu nufuzli musobaqada hamshaharimiz iste'dodli yosh sportchi Islom Abduzokirov 71 kilogramm vazn toifasida munosib ishtirok etib, kumush medalni qo'lga kiritdi.

IBRAT IZLAGANGA IBRATDIR DUNYO



QAYTAR DUNYO, BU...

- Ha, do'stim, nega asabiylashasan, tinchlikmi?

- Ko'rmaysanmi, papasha bilan mamashkamni? Qiziq, ularga barcha sharoitni keragidan ortig'i bilan yaratib qo'ygan bo'lsam. Ularga xizmatchi yollaganman. Qishloqda yashashsa-da, biron-bir og'ir ish qildirmayman: kir yuvishmaydi, ovqat qilishmaydi, ikkallasida ham eng so'nggi rusumdagi qo'l telefoni. Qiziq ularni tushunmayman, nuqul menga qo'ng'iroq qilib, biz seni, nabiralarimizni sog'indik, qachon kelasizlar, deb hol-jonimga qo'yishmaydi. Nima, men bu yerda o'ynab yuribmanmi? Axir, mening ham dam olish kunlari rejalashtirgan muhim ishlarim bo'lishi mumkin-ku. Yo'q, men ularni tushunolmayman. Xo'sh, yana nima kerak, o'zi, ularga?!

Oradan 30 yil o'tib yana o'sha eski do'stlar:

- Ha, qadrdomim, nega xomushsan? Biron joying bezovta qilmayaptimi, ishqilib?

- Ko'rmaysanmi, bu farzandlarni, o'zlari bilan o'zlari ovora. Ularga qo'ng'iroq qilib, nega kelmayapsizlar, sizlarni sog'indim-ku desam, otajon, sizga nima yetishmayapti? Yeganingiz oldingizda, yemaganingiz ortingizda bo'lsa? Xizmatningizga maxsus kishi yollagan bo'lsak. Katta hovlida o'zingiz o'zingizga bek bo'lsangiz, - deyishadi, zang'arlar. - Axir, yolg'izlikdan bu hovli meni yutib yuboray deyapti-ku! Axir, bularning barchasi, farzand nabiralarimning bir daqiqalik shirin diydoriga, ular bilan muloqot gashtiga yetmaydi-ku. Nahotki, ular shu oddiy narsani bilishmaydi?!

Xulosa. Farzandlar va nabiralar davrasidagina baxt to'kis bo'lar ekan. "Farzandnoma" kitobidan.

OYLIGIMDAN QARZ
TO'LAYMAN VA QARZ
BERAMAN

Podshoh sayr qilib yurib, o'z bog'bonini uchratibdi.

- Aytingchi, odatda qilgan mehnatingizga qancha haq olasiz? - so'rabdi undan.

Bog'bon javob beribdi:

- Uch tilla tanga.

- Xo'sh, so'ng buncha pulni nima qilasiz?

- Bir tangani o'zim uchun sarflayman. Bir tangani qarzingga to'lab, yana bittasini qarz beraman.

- Tushunolmadim, - ajablanibdi podshoh. - Hammasini o'zingizga sarflasangiz bo'lmaydimi? Yaxshigina haq olarkansiz, sizga qarz berib, qarz to'lash nimaga kerak?

- Nega bunday qilmayin ekan? Axir bu mening burchim.

- Ya'ni?

- Ya'ni, men bir tilla tangani ota-onam uchun, bittasini esa bolam uchun ishlatishim shart!

Shunda podshoh tabassum qilib, bog'bonning xizmat haqini yanada oshirishlarini buyurgan ekan.

Siz-chi, qadrdom? Qarzlarni vaqtida to'lab, vaqtida beryapsizmi?

HIKMATLAR
XAZINASIDAN

Ko'zlaringizni samoga qaratsangiz - ularda osmon aks etar, botqoqqa qaratsangiz - botqoq aks etar. Ko'zimizni qaerga qaratishimiz esa bizning irodemiz va xohishimizga bog'liqdir.

Konfutsiy.

Olamdagi eng boy odam - o'z quvonchi uchun eng kam mablag' sarflaydigan odamd.

Genri David.

Yaxshilik shunday ne'matki - uni hatto ko'zi ojizlar ko'ra oladilar, qulog'i og'irlar eshita oladilar.

Mark Tven.

Odamning o'zi istamasa, hech qanday o'git-nasihatlar unga to'g'ri yo'l ko'rsatolmaydi.

R. Rollan

BILIMINGIZNI SINAB KO'RING!

O'zbekiston Respublikasi Prezidentining Farmoni bilan O'zbekiston metallurgiya zavodi qaysi yili va nima munosabati bilan qanday mukofot olgan?

Bekobodlik metallurglardan bir kishi "Fidokorona xizmatlari uchun" ordeni bilan taqdirlangan. Uning kimligini bilasizmi?

Uni pishirib ham, qovurib ham, qaynatib ham bo'lmaydi va hattoki muzlatgichga ham solib bo'lmaydi. Shunga qaramay uni butun dunyo iste'mol qiladi.

Nimaga super yelim o'zining idishiga yopishib qolmaydi?

Ularga erkaklar ham, ayollar ham to'ymaydi. Lekin ularni yeb ham bo'lmaydi, ichib ham bo'lmaydi. Ular nima?

Javoblarni gazetaning keyingi sonidan bilib olasiz.

Gazetaning o'tgan sonidagi savollarning javoblari.

1962-yil turdosh korxonalar ichida birinchilardan bo'lib marten sexida eritilgan po'latni quyish mashinasi (UNRS) foydalanishga topshirilgan.

1988-yilda Anatoliy Mixaylovich Anoxin muqobilik asosida zavod direktori etib saylandi.

"Kamera" so'zi asli arabcha "Qamara" - oy ya'ni, quyosh nurlarini qaytaruvchi jism so'zidan kelib chiqqan.

Qizning ismi Anora. Anor - meva nomi. Nor - hayvonning nomi (tuya). Or - insonga kerak narsa. R tovushi hayvonlarga yoqmaydi.

Katta yoshdagi inson tanasidagi kapillyar tomirlarning uzunligi 100 ming km.ni tashkil qiladi. Bu yer sharini ikki marta aylanib chiqish degani.

KELING, BIR
KULISHAYLIK!

Sudya jabrlanuvchidan so'rabdi:

- Sizni tilla zanjiringizni o'g'irlab qochgan shaxsni tani olasizmi?

Jabrlanuvchi:

- O'g'rining advokati himoya nutqidan keyin, tilla zanjirim bor-yo'qligiga ham shubhalanib qoldim, o'rtoq sudya!..



Qo'shnim Hamdam boboning aytishicha, u Titanikni o'z ko'zlari bilan ko'rgan ekan.

Boshidanoq hammani kema cho'kib ketishi haqida ogohlantiribdi. Hech kim e'tibor bermabdi.

Ammo, bobo baribir kema cho'kib, yo'lovchilarning katta qismi halok bo'lishini qayta-qayta aytaveribdi...

Axyri, odamlar bezor bo'lib, boboni kinoteatrdan haydab chiqarib yuborishibdi.

Po'lat o'tda toblanadi, odam mehnatda
**Metallurg
Minbari**

MUASSIS:
O'zbekiston metallurgiya
kombinati aksiyadorlik jamiyati.

WWW.uzbeksteel.uz

Muharrir:
Ismadiyor MAMATQULOV

TAHRIRIYAT: Bekobod shahar
"O' zmetkombinat"
aksiyadorlik jamiyatining
Metallurglar madaniyat saroyida
joylashgan.

Tel: 10-17, 70-214-19-24

Gazeta oyda bir marta
chiqadi.

Gazeta tahririyat kompyuterida
terilib, sahifalandi va "Niso
nashriyot va matbaa uyi" MCHJ
bosmaxonasida chop etildi.
Bosmaxona manzili:
O'rta Chirchiq tumani "Mash'al"
mahallasi, "Markaziy" ko'cha, 1-uy.

Sahifalovchi:
Inom Xojimurodov

Bosishga topshirish vaqti 17.00
Bosishga topshirildi-14.20
Adadi 600. Bichimi A-3.
ISSN 2181-645X
Gazeta "O' zmetkombinat"
AJda bepul tarqatiladi.

Buyurtma №